

四庫全書

集部

# 欽定四庫全書

集部

文章辨體彙選卷六百

八十至  
八十三

詳校官中書<sub>臣</sub>李采

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官編修<sub>臣</sub>沈清藻

謄錄監生<sub>臣</sub>錢雋選

欽定四庫全書

文章辨體彙選卷六百八十一

明 賀復徵 編

墓碑十六 別體

曹娥碑文 魏郎鄆淳

孝女曹娥者上虞曹盱之女也其先與周同祖末曹荒  
淫爰茲適居時能撫節按歌婆婆樂神以漢安二年五  
月時迎五君逆濤而上為水所淹不得其屍時娥年十

四號慕思盱哀吟澤畔旬有七日遂自投江死經五日  
抱父屍出以漢安迄於元嘉元年青龍在辛卯莫之有  
表度尚設祭誄之辭曰鬱伊孝女睚睚之姿偏其反而  
令色孔儀窈窕淑女巧笑倩兮宜其家室在洽之陽大  
禮未施嗟喪慈父彼蒼伊何無父孰怙訴伸告哀赴江  
永號視死如歸是以眇然輕絕投入沙泥翩翩孝女載  
沈載浮或泊州渚或在中流或趨湍瀨或逐波濤千夫  
失聲悼痛萬餘觀者填道雲集路衢泣淚掩涕驚動國

都是以哀姜哭市杞崩城隅或有尅面引鏡務耳用刀  
坐臺待水抱樹而燒於戲孝女德茂此儔何者大國防  
禮自修豈况庶賤露屋草茅不扶自直不鏤自彫越梁  
過宋比之有殊哀此貞厲千載不渝嗚呼哀哉辭曰

名勒金石質之乾坤歲數歷祀立廟起墳光於后土顯  
昭天人生賤死貴列之義門何悵華落飄零早分葩艷  
窈窕永世配神若堯二女為湘夫人時效髣髴以昭後  
昆

饒娥碑

唐柳宗元

饒娥饒人饒姓娥名世漁鄱水娥為室女淵懿靖專雖  
小家未嘗出游治締葛供女事循整鄉閭敬式娥父醉  
漁風卒起不能舟遂以溺死求尸不得娥聞父死走哭  
水上三日不食耳鼻流血氣盡伏死明日屍出黿魚鼉  
蛟浮死萬數塞川下流鄱旁小民悲感怨號以為神奇  
縣人鄉人會錢具儀葬娥鄱水西橫道上追思不足相  
與作石以詔後世其辭曰

生德無類氣靈而伏嗟茲孝娥惟行之周淵懿舍貞好  
靖不游纖葛締紆克供以修蒸蒸在家其父世漁飲酒  
不節死乎風濤匍匐來哭號天以呼顏目耳鼻膏血交  
流三日頓踣氣竭形枯父尸既出孝質已殂龜鼈鼃鼃  
有蛟洎魚充流溢岸旁出仰浮見怪形異適與我謀都  
民哀號或以頌歌齊女色憂傷槐罷誅趙姬完父操棹  
爰謳肉刑不施漢美淳于烈烈孝娥水死上虞娥之至  
德實與為儔恒人有言惟教是圖懿茲德女家世不儒

奇行特出神道莫酬窮哀固泄終古以留鄉人好禮爰  
立茲丘建銘當道過者下車

高愍女碑

李翱

愍女姓高妹妹名也生七歲當建中二年父彥昭以濮  
陽歸天子前此賊質妹妹與其母兄而使彥昭守濮陽  
及彥昭以城歸妹妹與其母兄皆死其母李氏也將死  
憐妹妹之幼無辜請獨免其死而以為婢於官皆許之  
妹妹不欲曰生而受辱不如死母兄且皆不免何獨生



為其母與兄將被刑咸拜於四方妹妹獨曰我家為忠  
宗黨誅夷四方神祇尚何知問其父所在之方西嚮哭  
再拜遂就死明年太常謚之曰愍當此之時天下之為  
父母者聞之莫不欲愍女之為其子也天下之為夫者  
聞之莫不欲愍女之為其室家也天下之為女與妻者  
聞之莫不欲愍女之行在其身也昔者曹娥思時自沈  
於江獄吏嘆囚章女悲號思言其兄作詩載馳緹縈上  
書迺除肉刑彼四女者或孝或智或義或仁噫此愍女

厥生七年天生其知四女不倫向遂推而布之於天下  
其誰不從而化焉雖有逆子必改行雖有悍妻必易心  
賞一女而天下勸亦王化之大端也異哉愍女之行而  
不家聞戶知也貞元十三年翱在汴州彥昭時為潁州  
刺史昌黎韓愈始為余言之余既悲而嘉之於是作高  
愍女碑

劉棗強碑

皮日休

歌詩之風蕩來久矣大抵喪於南朝壞於陳叔寶然今

之業是者苟不能求古於建安即江左矣苟不能求麗  
於江左即南朝矣或過為豔傷麗病者即南朝之罪人  
也吾唐來有是業者言出天地外思出鬼神表讀之則  
神馳八極測之則心懷四溟磊磊落落真非世間語者  
有李太白百歲有是業者彫金篆玉牢奇籠怪百鍛為  
字千鍊成句雖不在躅太白亦後來之佳作也有與李  
賀同時有劉棗強焉先生姓劉氏名言史不詳其鄉里  
所有歌詩千首其美麗恢瞻自賀外世莫得比王武俊

之節制鎮冀也先生造之武俊性雄健頗好詞藝一見先生遂加異敬將署之賓位先生辭免武俊善騎射載先生以貳乘逞其藝於野武俊先騎驚雙鴨起於蒲稗間武俊控弦弦不再發雙鴨聯翬於地武俊歡甚命先生曰某之技如是先生之詞如是可謂文武之會矣何不立一言以讚耶先生由是馬上草射鴨歌以示武俊議者以為禰正平鸚鵡賦之類也武俊益重先生由是奏請官先生詔授棗強縣令先生辭疾不就世重之曰

劉棗強亦如范萊蕪之類焉故相國隴西公夷簡之節  
度漢南也少與先生游且思以見命列將以襄之縣器  
于事賂武俊以請先生武俊許之先生由是為漢南相  
府賓冠隴西公日與之為筆宴其獻酬之歌詩大播於  
當時隴西公從事或曰以某下走之才誠不足污辱重  
地劉棗強至衆必以公賓劉於幕吏之上何散之如是  
公曰愚非惜幕間一足地不容劉也然視其狀有不足  
稱者視公視某與劉分豈有間然哉反為之惜其壽爾

後不得已問先生所欲為先生曰司功掾甚閒或可承  
闕相國由是掾之雖居官曹宴見與從事儀埒後從事  
又曰劉棗強縱不容在賓署承之於掾曹誑矣奚不疏  
整其秩相國不得已而表奏焉詔下之日先生不恙而  
卒相國哀之慟曰果然正掾曹然吾愛客葬之有加等  
墳去襄陽郭五里曰柳子關後先生數十歲日休始以  
鄙文稱於襄陽襄陽邑人劉永高士也嘗述先生之道  
業嘗咏先生之歌詩且歎曰襄之人只知有益浩然墓

不知有先生墓恐百歲之後埋滅而不聞與荆棘凡骨  
溷吾子之文吾當刊焉日休曰存既摭實錄之何媿嗚  
呼先生之官卑不稱其德宜加私謚然棗強之號世已  
美矣故不加焉是為劉棗強碑銘曰

已矣先生祿不厚矣彼蒼不誠位既過於趙壹兮才又  
逾於禰衡既當時之有道兮非沒世而無名嗚呼襄陽  
之西墳高三尺而不樹者其先生之故塋

翰林侍讀學士梅公神道碑

宋王安石

宋翰林侍讀學士正奉大夫行給事中知許州軍州事  
兼管內堤堰橋道勸農事上柱國南昌郡開國公食邑  
二千三百戶食實封六百戶賜紫金魚袋梅公之墓在  
宣州宣城縣長安鄉西山里公有五子鼎臣德臣寶臣  
輔臣清臣清臣今獨在為尚書司門郎中以公行狀及  
樂安歐陽公之銘請文以刻墓碑時熙寧元年八月四  
日也銘曰

公先梅伯後氏其國彌周涉秦不見史策有銷有福著



漢名籍公福之孫詢字昌言三世弗仕陵陽之里公第  
廷中判官利豐再歲而擢以丞將作以宰仁和人譽用  
多主推御史侍考進士一見天子以為知己詔曰試哉  
遂試中書館之集賢賜服緋魚於時繼遷兵我西鄙老  
弱餽守丁彊多死靈州告危帝視不怡公請擇人使潘  
羅支兵法所謂以夷攻夷帝曰誰可無如臣者曰予汝  
嘉閑陷奈何公拜且跪颺言而起苟紓西師臣不愛死  
出書授之往訖爾謀至彊勅還會棄靈州帝察公藝可

書帝制相或止之留佐三司其後羅支果害西賊論將料敵皆如所策或從或違或擠或推悟合阻夷神者公尸黜之倅州用獄一青去杭而蘇列國東屏漕輸浙河就付將領三年告功僅得故省又以譴投守彼淮州有僚許公相得於此與之欣然樂以忘徙使於湖北遷自濠梁又奪一官往禪於襄坐發驛馬給奔喪者于鄂于蘇剖將之符握節關中使總其輸煌煌金章厥賜特殊謀復靈武度兵葫蘆秦有將瑋諾公與俱會瑋召還公

復淪胥有反咸陽能名氏朱始雖弗察後捕而誅自懷  
徂池再副戎車真宗新陟罪垢皆滌為郎度支以將廣  
德外更四州楚壽陝荆乃還待制中糾獄刑有歸龍圖  
其唐殖殖就以學士專其閣直輟之銓衡乘傳臨并超  
遷郎秩進直樞密趨歸封駁考國中失申命選事得權  
進絀加職侍讀改司羣牧移之審官審是在服伐閱積  
遷給事於中告疾出許鼓歌從容方公少壯志立人上  
談辭慨然帝悅而嚮及後晚出皆為將相公則老矣將

歸田里康定辛巳六月十日公七十八以其官卒公開  
南昌勲爵第一夫人曰劉不及郡封封君彭城其卒先  
公公卒明年季秋挾日于州山西卜祔而吉公有四子  
伯為進士丞于殿中與仲前死仲賜科名叔也皆丞將  
作殿中或廢或興有顯惟季時丞衛尉今為郎中論序  
初終實來求詩刻示無窮

文章辨體彙選卷六百八十

欽定四庫全書

文章辨體彙選卷六百八十一

明 賀復徵 編

墓碑十七

以下排體

魏散騎常侍步兵校尉東平太守碑文

魏嵇康

先生諱籍字嗣宗陳留尉氏人也厥遠祖陶化於上世而先生弘謨於後代詩所載阮國則是族之本也先生承命世之美希達節之度得意忘言尋妙於萬物之始

窮理盡性研幾於幽明之極和光同略羣生莫能屬也  
確乎不可拔當塗莫能貴也或出或處與時升降或默  
或語與世推移望其形者猶登嶽涉海蕩然無以究其  
高測其深覽其神者猶旁璞親珪肅然無不欽其寶而  
偉其奇也不屑夷齊之潔故其清不可尚也不顧惠連  
之污故其道不可屈也遽瑗升降於卷舒甯武去就於  
愚智顧盼二子不亦泰如危宗廟之犧安不靈之龜故  
無孤犢之逼而有塗中之廣觀屈穀鳴雁是以處不才

之間察巨瓠緯帶是以遊有用之際夸大辨而御之以  
訥資大白而滂之以辱為無為而名不能累也事無事  
而世不能役也訪垂天之翼於寂寞之域投芒刃之類  
於有解之會固恢恢必有餘地豈若接輿被張以養生  
於陵灌園以求實齷齪近步脩軌轍而已哉尼父議老  
成於猶龍衛賜譬重仞於日月揆之先生其殆庶幾乎  
方將攀逸駕於洪崖懇遐軌於巢州跨宇宙以高挹凌  
雲霄以優游享年若干遘疾而卒於是遠鑒之士有識

之徒先生之沒夫豈不慨然臨豪傑而存惠子之問運  
斧斷而思郢人之力乃探蹟索隱以叙雅操使將來君  
子知莊生之跡略舉其志碑之曰

峩峩先生天挺無欲玄虛恬澹混齊榮辱盪滌穢累婆  
娑山足胎胞造化韜蘊光燭鼓棹滄浪彈冠喬嶽頤神  
太素簡邁世局澄之不清清之不濁翺翔區外遺物庶  
俗隱處巨室反真歸漠汪汪淵泉邁跡圖錄

褚先生伯玉碑

梁孔稚珪



夫河洛摛寶神道之功既傳岱華吐秘仙靈之跡可覩  
蓋事詳於玉牒理煥於金符雖冥默殊源顯晦異軌測  
心觀古可得而言焉是以子晉笙歌馭鳳於天漢王喬  
雲舉控鶴於玄都有羽化蟬蛻觸影遯形神翬帝宮跡  
留劒杖遊瑤池而不返宴玄圃以忘歸永嘉惡道者窮  
地之險也歆竇竭日折石橫波飛浪突雲奔湍急箭先  
生攀途躋阻宿世涉折而衡飈夜鼓山洪暴激忽乃崩  
舟墜壑一倒千仞飄地淪高翻透無底徒侶判其冰碎

舟子悲其電散危魂中夜赴阻相尋方見先生恬然安  
席銘曰

關西升妙洛右飛英鳳吹金闕簫鼓玉京絕封萬古乃  
既先生先生浩浩惟神其道泉石依情烟霞入抱秘影  
窮岫孤栖幽草心圖上玄志通大造

桓宣城碑

任昉

君器量高濬神氣披朗商畧雅俗隱括真偽擢竒取異  
不軌常流固以準的當時擬議耶許矣處身立朝不峻

功名俯仰顯默之際優游可否之間跡卑而道不汚身  
屈而志不屑矣銘曰

於穆我后稟茲純爽虛豁高暢蕭條邁上風任外舒卓  
鑒內朗神棲冲慎形同俯仰將登槐棘宏振綱綱令儀  
早徂德音永饗

豫章文憲王碑

沈約

世載冠冕之暉家開配天之業洪源邁於委水雲峯冠  
於削成公自天攸縱非待河嶽道亞生知德備藏往摩

赤霄而理翰望閭闔以上馳迴風颭於襟袖宅山川於懷抱爰初弱冠藏器俟時康莊廣闢飾禮賢之館杞梓備收罄滋蘭之畹既駕朱駟又敷袞職升降軒陛率由孝敬謙以備物貴以在身再握勵已三吐忘倦公德惟民望位冠朝首儀表瑰雄風神秀傑每至三元首旦華裔在庭執玉端闈冠冕百辟外夷震聳猶單于之懼王商羣后瞻慕若衆星之俯日月雖復以周公之親居周公之任道格皇天光被四海而小善靡失輜德必從譬

由畝澮匪讓所以森致江河土壤同歸故能鬱成高岱  
保翼三善弘正九代銘彼太常懸諸日月銘曰

大德風邁其美雲從事貴愈貶禮峻彌恭且有厚命車  
服以庸羽儀列辟冠冕羣龍周實多祐漢有餘慶奕奕  
皇族於斯為盛公之綏之終和且敬是惟宗國庶邦作  
詠

隱居貞白先生陶君碑

蕭綸

夫夜光結綠非眩篋之恒珍逸羽翔鱗豈園池之近玩

寧期心於遠大蓋不知其所以然也是以潁陽高蹈洗耳於唐朝漢陰負薪滅跡於周代盛德風流有自來矣應期而曜質者其在茲乎先生名弘景字通明本冀州平陽人也其先自帝堯陶唐氏之後胤堯治冀州平陽故因居止龍馬見五色之符欽明表八彩之瑞光宅於天下允釐於庶職洪源負遠系緒綿長漢興陶舍為高祖右司馬子青翟位至丞相後至漢末南渡始居丹陽七世祖濬仕吳為鎮南將軍荊州刺史祖降宋南中郎

參軍事父貞寶司徒建安王國侍郎並立履清約博涉  
文史先生含元精之和氣蓄陵臆之雅姿兼宣七善總  
修九德行仁蹈義嶽峙淵渟牆仞無以覩清濁不能測  
道風與星漢同高勝氣與烟霞共遠六歲便解書能屬  
文七歲讀孝經毛詩論語數萬言曼倩幼習典墳公幹  
少誦詩賦方之於古彼有多慙是以岐嶷流聲黃中著  
稱有鄉人得葛洪神仙傳見淮南八公諸仙事乃歎曰  
讀此書便使人有凌雲之氣於是寢興諷誦晨夜不輟

年二十七為宜都王侍讀總知管記事謗道求賢焚林  
招士朝難其選是曰得人阮瑀之書記不足扶衡孫楚  
之才辭何以捧輶齊代好治宮室方脩苑囿青溪舊觀  
更就起築仍奏表上頌辭事兼美邁彼樂職之篇踰乎  
景福之製帝省覽久之益以為善除奉朝請恪居官次  
夙夜惟寅春秋請是棫樸者也先生本不希榮常欲  
辭退乃與親友書曰疇昔之意不願處人間年登四十  
志畢山藪今三十六矣時不我借知幾其神乎無為自



苦明年遂拜表解職抽簪東都之外解組北山之陽同  
稷丘之栖真慕留侯之却粒便其舟楫永言東邁朝廷  
錫問時賢餞別祖以二疏招茲四皓超然輕舉異世同  
符爾乃杖策孤征游踐山嶽既而到于句容登于茅嶺  
以此地神仙之官府靈異之栖託往不能返遂卜居焉  
先生曰夫子云隱居以求其志行義以達其道吾聞其  
語未見其人我今義道無復其一請同求志之業故自  
稱隱居亦猶稚川之抱樸士安之玄晏倚巖栖隱依林

遁跡交柯結宇剗徑為門懸崖對溜悲吟灌木深壑絕  
峭組織烟霞枕石漱流水禽無撓採藥耦耕野獸不亂  
逍遙閒曠放浪陵山嗒然若喪確乎難拔屬齊末道消  
天命既否水闔穀洛地震由辰先生靜思冥數預識微  
兆於是近遠書問悉皆杜絕昔乃聞之夏甫今則見之  
先生我大梁休運應期受天明命三辰開朗四海寧謐  
先生奉表稱慶於是信問復通天監以來常有勅旨供  
給藥餌不乏歲時渥澤湛恩莫之與比先生七年暫遊

南嶽茲山也譬閭風之地軸若崑陵之天鎮八桂傍臨  
九純間設樹有琅玕草生車騎遺世獨往是用忘歸一  
十年有勅遣左右司徒惠明徵還先生茅山別給廨宇  
軒后之降精天老漢帝之致禮河宗況於茲日弗能尚  
也養志山阿多歷年所攝生既善冥祥亦降猛獸不據  
魑魅莫逢庭無荆棘遠同闕里階吐神泉逕動仙都於是羽  
人徘徊仙客上下鸞鳳游集芝英豐潤大造佛像爰及  
寫經起塔招僧備諸供養自誓道場受菩薩戒夢登七

地又得嘉名具以啟聞蒙勅許可葛玄之夢見開士朱  
鸞之遠望尊儀何以擬茲通感匹此徵應以大同三年  
歲次景辰三月壬寅朔日癸丑告別年化春秋八十有  
一天子嗟惜儲皇軫悼有詔稱譽追贈中散大夫謚曰  
貞白先生禮也以某月十四日寔於丹陽郡句容縣雷  
平山若軒轅之葬衣冠如王喬之藏劔舄化於茲日可  
得偶焉先生器宇凝深思識精贍含章貞吉不脩廉隅  
年將中壽匪踰於矩眉目疎朗儀貌鮮潔實亡勸沮多

行德惠懷惜光景愛好墳籍篤志勵節白首彌至若乃  
淮南鴻寶之訣隴西地動之儀太一遁甲之書九章厯  
象之術幼女銀鈞之敏允南風角之妙太倉素問之方  
中散琴操之法咸悉搜求莫不精詣爰及卞射荀慕蘇  
卜管筮一見便曉皆不用心張華之博物馬鈞之巧思  
劉向之知微葛洪之養性兼此數賢一人而已門人恒  
法閭等慕遙風於緱氏繪遺像於橋陽勒玄碑而相質  
騰絳霄之流芳乃為銘曰

留爲表化棄劒凝神徘徊紫氣照耀丹鱗厥跡猶在餘  
風可遵誰其嗣此淵哉淑人高行邁種盛德日新朗猶  
懸鏡鬱似貞筠身以弘道行不違仁昔游纓綬頤頤縉  
紳厭乎匡救勞彼問津亦既解組乃襲山中遠尋丘壑  
高蹈風塵情無緬世隱不隔真結宇依巖貞棲茂草水  
玉留年精華却老乃有令問兼斯壽考泉過危庭峯臨  
窈洞露凝蘭階雲生桂棟日斜欄席花落窻甕尚平未  
反王孫不旋海桑交易陵谷貿遷豐碑有樹遺烈無騫

常山公主碑

溫子昇

啟秦微之層構闢閭闔之重扉據天下以為家苞率土而光宅然則崑山西峙爰有夜光漢水東流是生明月公主稟靈宸極資和天地芬芳有性溫潤成質自然秘遠若上元之隔絳河直置清高類姮娥之依桂樹令淑之至比光明於宵燭幽閒之盛匹穠華於桃李托體宮闈而執心撫順宛然左辟率禮如賓舉華燭以宵征動烏佩而晨去致肅雍於車乘成好合於琴瑟立行潔於

清冰抗志高於黃鵠停輪表信闔門示禮終能成其子  
姓貽厥孫謀而鐘漏相催日夜不息川有急流風無靜  
樹奄辭身世從宓妃於伊洛遽捐館舍追帝子於瀟湘  
銘曰

龍轡莫援日車遂往奄離形神忽歸丘壤祖歌薤露出  
奏巫山永厝中野終掩窮泉蕭瑟神道荒涼墓田松楸  
徒列琬琰空傳

文章辨體彙選卷六百八十一



欽定四庫全書

文章辨體彙選卷六百八十二

明 賀復徵 編

墓碑十八

車騎將軍賀婁公碑文

北周庾信

昔者軒丘命氏初分兄弟之姓若水降居始建諸侯之國自是以官為族因地為宗水派枝分其可知矣公諱慈字元達本姓張清河東武城人也仕於周張仲為孝

友謀於晉張老為忠臣韓有開地則五世彊國趙有孟  
談則三卿不戰祖慶少習邊將憑仗智勇雖復五車竹  
簡不取博士之名一卷兵書即以將軍自許角端在手  
必無齊魯之侵蓮花挿腰甚得蛟龍之氣為車騎大將  
軍儀同三司散騎常侍霸成縣開國伯贈河州刺史父  
璨公子公孫有鎡基於天下良弓良冶有世業於家風  
書則百家可知劒則千人可敵三槐以鼎鼎象物知其  
神姦五等以桓珪班瑞守其宮室君以才望兼而受之

終於持節車騎大將軍儀同三司散騎常侍武定縣開  
國公贈河州刺史惟公秉山岳之靈受星辰之氣年在  
髫髻甫就勝衣竹馬來迎已齊名於郭伋羊車在道即  
見賞於王澄豈直童子明經書生說卦而已至如禪河  
清論秋水高談故以辨折龜林聲馳鹿野國家官族君  
為首姓起家車騎大將軍儀同三司襲爵為公增邑合  
一千六百戶弱冠登朝傳呼甚寵漢魏台鼎故無此比  
中朝方伯罕有其年大冢宰任總機衡是勤王畧惜君

忠壯委以爪牙乃領左廂親信出為梁州防主華陽西  
極漢水東流已濮既寧沈黎即靜保定四年王師北伐  
以君驍勇被召將兵師下宜陽身登函谷將燒白馬之  
城以覆烏巢之壘既而中途甚雨未獲圍原軍師聞喪  
不成侵宋柱國趙王今上之第九弟也文則河間上書  
武則任城置陣作鎮岷丘揚旆錦水白虎之俗難安黃  
龍之盟不定以君智畧入佐中權天和元年授使持節  
大都督治柱國總府司錄仍轉司馬餘官封如故相如

西喻鏤石於靈山武侯南征浮船於瀘水方之今日彼獨何人九品課工為上之下四年入朝歸事宰旅即受載師大夫將命齊國尋盟出境即用和隣之儀入國聞喪仍從會葬之禮可使南面此之謂乎尋以本官入治軍正至如渭水兵書在心為志軒轅陣法聚石成圖既得師不疲勞兵無怨讟入陪中禁更領儀同郎客城池門闌戶籍咸資巡警並用司存帝城近臣公室密戚如逢司隸似畏都官既而孤城鄭嫗不相其年已水涸翁不醫

其疾春秋三十有三奄捐官舍呂子明之疾甚歎軫吳王阮元瑜之長逝悲深魏主有詔贈其官禮也以建德四年三月日歸葬於河州苑川郡之禁山公六郡良家西河鼎族地壯金行人雄塞氣兵書七卷河水浮來射法三篇天弧夜下鋒旗不息刁斗恒驚猶得馬上讀書軍中習禮太史子義善於謀策諸葛公休長於撫馭四代儀同三司七世河州刺史鍾鼎成列冠蓋連陰所謂生為貴臣死為貴神者也但以游魂久客反葬途遠道

阻山長妻孤子幼哀聲滿野愁氣連雲况復松檟飄颻  
方臨武威之戍丘陵迴遠直對臨洮之城馬援亡於武  
溪尸柩返於槐里梁鴻死於會計妻子歸於平陵嗚呼  
哀哉崎嶇遠矣昔者繁昌祠前即有黃金之碣德陽墓  
下猶傳青石之碑是謂勒功乃為銘曰

七葉佐漢五世相韓忠臣入仕孝友當官青城仙洞黃  
石祠壇臺堪走馬書足迴轡武定風飈霸城嚴肅並馳  
雙傳俱分兩竹重世剌舉連鑣袞服草靡青丘風馳赤

谷世不乏賢挺茲上嗣孝有三德忠無二志劍足身挺  
書堪面試旂節既秉高蟬且珥龜轉印函蛇盤綬笥左  
右將軍前後常侍繼踵五侯因循三事旂旃九坂艤舳  
雙流還樞木馬更引金牛江波錦落火井星浮罇酒望  
帝安歌蜀侯受賑河陽偏師洛浦署陣成臯連旗廣武  
朝兵滅竈夜營多鼓箭起六廩鋒摧九虎倏忽人世俄  
然今古崇發兩星鑿驚二監遊魂通夢言返舊塋紫泥  
賜冊黃腸贈行途登石紐路入金城寒闌樹直秋塞雲



平劍埋合柱書藏鑿楹武侯為廟藥公為社雲蓋低臨  
霓裳紛下碑枕金龜松橫石馬永矣身世留名華夏

周大將軍崔說神道碑

庚信

公諱說字某博陵郡安平縣人也昔者華陽之野降龍  
首之神烈山之都啟龜文之繇匡周則孟津有會佐夏  
則龍門始鑿西遊則起家秦相東入則載世齊卿備乎  
史籍可得言矣祖辨平遠將軍定州刺史父楷鎮北將  
軍司馬烈侯並厲風霜俱張鋒穎邸史疊迹官曹凜然

是謂鮑恢都官百城振懼芎豐握節京師斂手公特稟  
英靈徧鍾山岳雄姿俊茂眉目疎朗觀虎於檻齧髮不  
驚稱象於船勝衣能對至於拉虎羈熊摧班碎掌忘歸  
繁弱落鴈吟猿故得氣蓋關中威申河外解褐領軍府  
錄事轉諮議參軍時當塗失御政在權門始論函谷之  
兵即起韓陵之戰太師賀拔勝作牧西京公為假節冠  
軍將軍防城都督及南陽失守卷甲奔梁樂毅羈旅猶  
思燕路陳軫愴悽終戀秦聲幸值和隣言歸舊國授衛

將軍都督封安昌縣開國子食邑三百戶弘農剋復沙苑揮鋒進爵為侯增邑并前一千一百戶信珪則更授司勳穀璧則還輸典瑞鐵馬有河橋之戰戈船有汾水之兵除京兆太守移民下邑未學邊韶走馬章臺不同張敞遷帥都督持節撫軍通直散騎常侍大都督防禦使持節車騎大將軍儀同三司都管尚書定州大中正五曹奏事有朱穆之忠九品論人見楊喬之直改封安國縣侯益邑合前一千四百戶賜姓宇文改名為說漢

王改婁敬之族事重論都魏后變程昱之名恩深捧日  
遷車騎大將軍開府儀同三司加侍中竇憲連官單于  
之寶鼎可致張寬固位渭橋之流星可識司木七工既  
掌丘陵之賦司會六典乃均邦政之才居官得人于斯  
為盛進爵為公改封萬年縣通前二千四百戶除隴州  
刺史都督隴州諸軍事隴城路遥秦川望遠鄧仲華之  
不去馬文淵之願歸尋除涼州刺史總督河西甘瓜諸  
軍事地似伏龍城如飛鳥燉煌實錄宛在胸襟玉門亭

障無勞圖畫有馬如羊不以入廩有金如粟不以入懷  
柱國齊王今上之介弟襲行薄伐問罪河陽以公為行  
軍長史參謀帷幄中軍之司既舉魏絳上卿之佐實用  
荀林以公方之差無慙德除使持節大將軍大都督崇  
德安義建忠九曲安樂三泉伏流周張平泉固安蠻通  
谷凡十三防禦熊和中三州黃廬起谷王晏供超牽羊  
溫狐交河大嶺避雨木柵等一十戍諸軍崇德防主宜  
陽上地更有秦兵熊耳山前還逢積伏用是連營函谷

獵騎黎陽威振兩河名陵三晉改封安平縣公淮陰一  
國韓信之故人戶牖萬家陳平之鄉里公此衣錦足為  
連類建德四年正月十日薨於長安之永貴里私第春  
秋六十有四詔贈敷延丹綏恒五州諸軍事敷州刺史  
謚曰莊公禮也即以某年二月二十四日葬於京兆平  
原鄉之吉遷里北陵追遠大司馬有賜綬之恩西京贈  
行冠軍侯有詔葬之禮嗚呼哀哉世子儀同衍生事以  
禮死葬以禮愛親有王祥之孝同氣有姜肱之睦百行

之本於斯備焉况復松檟深沈既封青石之墓丘陵標  
榜須勒黃金之碑乃為銘曰

華陽之神厲山之祖鳳野匡周龍門佐禹日浴溟池山  
浮海浦甫穆霸國營丘樂土脣斯宗邑承此壤王移封  
東武就君安陽中軍節目鎮北鋒鉞商飈獵草電火驅  
霜公之輪煥繼體貞幹儀表丘墟風神牆岸孝有至德  
忠能匡贊不廢橫琴無妨欹案既班三事又貳六官衛  
青受詔韓信登壇長城馬窟廣武兵欄軍吏無犯營民

不寒乃用六謀乃論三策城壘向背星辰主客劍起沈  
犀弓開伏石楚后讓盟秦君還壁百齡危脆千仞摧藏  
諸侯地裂邊將星亡輕車騎士玄甲黃腸杜如齊地廟  
似桐鄉銘功贊德碑闕相望

周太子太保步陸碑

庾信

公諱逞字秀明本姓陸吳郡人也君子至止既紹虞賓  
鳳凰於飛實興齊國南越使者解漢帝之衣西陵將軍  
覆吳王之蓋曾祖載為宋王司馬留鎮關中赫連之亂



仗劍魏室黃河參陵或亡追路烏江艤船更無歸迹今  
為河南洛陽人也高祖冠軍將軍滎州刺史吳人有降  
附者悉領為別軍自是官師擁鐸更為吳越之兵君子  
習流別有樓船之陣父政驃騎大將軍儀同三司恒州  
刺史中都獻公太祖扶危濟傾經綸夷阻報君之恥遠  
襲平原以高平霸業所基委命留事關中餽食非直滎  
陽之師河內供軍豈但淇園之竹公秉照晉之靈降明  
神之德猛虎振檻七年不驚羝羊觸藩九齡能對諸兄

以公先君愛子稱之曰仁推而襲封雖復季末大成之

心守節

疑有闕誤

既遭燠穴翻從壓紐太祖初封函谷始合

諸侯以公詞令參謀機密故得戎政克宣師言無漏賜

姓步陸孤氏委鹿輅而論都入鴻門而舞劍方之吹律

綽有餘榮出身羽林監輕車將軍除尚書右丞官聯會

計務殷平準水衡貫朽常平粟紅授使持節車騎大將

軍儀同三司增邑千戶尋遷駕部中大夫領兵部中大

夫領蕃部

疑誤

東京鼎實先加鄧隲之勲西晉官人多用

山濤之啟豈若五王登朝必司賓主之禮六龍御轡取  
定鸞和之節御正以官觸父名不拜會稽有王會之名  
其子不為太守博陵有王沈之封其兒不為刺史遷驃  
騎大將軍開府入掌納言治司宗伯又為軍司馬職居  
常伯勤問於南宮位管王言連官於北斗豈止郊天祀  
地龍門嶰谷之聲贊鼓頒旗白露涼風之月闇夜有人  
餉羅數十匹公閉門不受行人干觸具以聞奏朝野稱  
之太尉楊震直推故吏之金涼州張奐高揖羌人

之馬清畏人知我無慙德齊國通和封人受使以公有  
出境之才見命張檀之禮既珠盤軟血定楚國之連名  
七首登壇反齊人之侵地是謂使乎固稱光國三輔  
公侯五陵鍾鼎桐街柳市塵起風飛乃授京兆尹增邑  
通前一千六百戶餘官如故上林兵息蘭池盜靜不學  
王楊平生鑄金之術未同張敞終日章臺之遊家僮暮  
行還得遺錢於道并白絕十足公訪得其主即以還之  
見金於路指以示人得錢於道留持掛樹方之今日異

代同風俄遷司會治小司馬重總六軍再操八柄考績  
入於歲成論功書之年表尋授宜州諸軍事宜州刺史  
露冕觀風停車待雨百城解印憚朱穆之威千里相迎  
受王基之德曾未期月被勅追還眷眷吏民不無河內  
之請依依故老實念黎陽之別少陽養德前星守器尊  
師讓齒必俟賢能乃授太子太保方之劉實道高於大  
邦譬以山濤榮深於小輦本有消渴之疾常餌金石自  
理舊疾微增奄捐館舍茂陵之下不留封禪之書校尉

之營惟餘服食之器嗚呼哀哉春秋四十有七建德二年五月十一日也天子以大臣之喪躬輟聽訟東朝以師傅之尊親臨攢祭詔贈某官

本傳作贈大將軍

謚某公禮也

以今三年正月十日葬於京兆之高陽原夫人郁久間西遇王姬愛敬肅恭言容令淑有聞歲纓無廢紘縱爰在盛年先從大夜今節婦開墳松栢已拱季孫成寢丘陵始同况復圖畫賢妃

一作姻

方在甘泉之室瘞埋才子

即用高陽之原公儀表外明風神內照器量深沈階基

不測事君惟忠事親惟孝言為世範行為士則留連墳  
索悵悵文詞霜府錄於尚書天官總於司會出入匡贊  
常帶數職身具六龜腰恒四綬陳平密謀既非天子所  
見荀彧上策又非諸侯所聞其為郡也惟取赤土封書  
其為州也唯以青鹽換粟留家則千樹無資遺子則一  
經而已嫡子操至性過禮純孝不遺墳前之樹染淚者  
先枯庭際之禽聞悲者則下銘曰

山連日觀水枕滇機富春沙起開陽柱飛大夫屈節將

軍振威南越受吏西陵解圍昔我烈祖垂翅秦中白馬  
無路烏江不通笛吟鄉里琴哀土風營州恒州擁旄世  
載壯節旃旆入雄關塞直河穿趙平雲臨代生謂立功  
沒為留愛降茲岳瀆誕此貞明祥符雲氣慶合星精宮  
帷定策殿柱書名忠泉暗漏孝笋寒生世屬殷周時逢  
楚漢天下三分鴻溝一半以我明略來參匡贊日乃再  
中天成兩旦遞參三事歷副六卿天師一作司光宅地載  
謨明春官定禮具官治兵識言默識溫樹無名謙恭周



密言行無乖忠公兕殪陰德地理軍國紛總部領填階

一作借

馬不入殿金不入懷具瞻惟德高山惟仰甲觀初

登龍樓初上東國桓榮西京疎廣年齒俄頃風電相推  
銘旌兩沒池柳雙迴甕甕屑子銜疚銜哀身彰野火心  
懼天雷日月其除榮終哀始馬歸司隸書還太史歷對  
天星墳連地市山勢接飛松形蓋起德音無絕平原忽  
矣

文章辨體彙選卷六百八十二

欽定四庫全書

文章辨體彙選卷六百八十三

明 賀復徵 編

墓碑十九

玄宗御書故中書令梁國公姚文貞公神道碑銘  
唐張說

叙曰八柱承天高明之位定四時成歲亭育之功存畫  
為九州禹也堯享鴻名播時百穀棄也舜稱至德由此

言之知人則哲非人罔又致君堯舜何代無人有唐元  
宰曰梁文貞公者位為帝之四輔才為國之六翮言為  
代之軌物行為人之師表蓋惟嶽降神應時而出者也  
公諱崇字元之姚姓有虞之後遠自吳興近徙于陝今  
家洛陽焉烈考長沙文獻公樹勲王室建旗舊府公紉  
綺而孤克廣前業激昂成學榮問日流武庫則矛戟森  
然文房則禮樂盡在弱冠補孝敬挽郎又制舉高第歷  
佐濮鄭並有聲華入為司刑丞天授之際獄吏峻密公

持法無頗全活者衆進夏官員外郎郎中侍郎朝廷曰  
能遂掌軍國遷鳳閣侍郎監修國史兼相王府長史始  
則天人讓王承置醴之顧終以飛龍利見延參乘之恩  
自時厥後恒當大任凡三處兵部尚書三入中書令一  
為禮部尚書左庶子又肅政大夫總靈武軍兵馬又司  
僕卿知隴右監牧出典亳宋常越許申徐潞揚同十郡  
景雲初以藩邸舊僚封梁國公食賦百室公性仁恕行  
簡易虛懷汎愛而涇渭不雜真率涇盡而應變無窮常

推是心以御于物故所莅必化庶風偃驚狠化從言不  
厲而教成政不威而事理去思覩頌來暮聞歌既登邦  
政卒乘輯睦及在宗伯神人允諧今之中書是為理本  
謀事兼于百揆論道總于三台公執國之鈞金玉王度  
大渾順序休徵來臻懋德格天名遂身遜拜開府儀同  
三司崇其秩逸其志也開元九年九月寢疾薨于東都  
慈惠里皇上悼焉國人慕焉撫牀輟春曾未云比制贈  
揚州大都督謚曰文貞禮也十年二月葬于萬安山之

南原在疾也王人賜膳御醫視藥于薨也中使弔臨羽  
儀哀送君臣之義厚莫重焉帝乃灑恩仙翰鏤澤豐珉  
日月照臨于佳城雲烟變態于神道寶其文字別為羣  
玉之山禁其樵蘇即表三司之墓

隴西節度大使贈涼州都督郭公神道碑銘

張說

四序平分清秋之氣勁五方異俗崆峒之人武故隴上  
多豪山西出將其有雲龍感召星象特生金鼓登壇隱  
如敵國麾幢指塞自比長城得之于太原公矣公諱知

運字逢時一門連譽時人號曰三儒四海齊名天下謂之八凱磧鹵之地戎馬生郊業戰鬪而弘勲仕州縣而為達啓莫京之繇福不在于其身積無聲之善慶必流于後嗣公太白之精雷泉之靈膺家之禎為國而生身長七尺力能扛鼎援臂虎口虬鬚鶚瞬射穿七札劒敵萬人子卿路逢遙識將軍之相唐舉一見足辨封侯之骨解褐以善戰授昭武校尉開元二年吐蕃入隴右掠坰牧公兵以奇勝寇不復蹤積甲山齊而有餘牧馬谷



量而未盡歸功廟算朝議多之拜羽林將軍持節隴右  
諸州節度大使兼鄯州都督河源軍使鎮西郵信國之  
藩屏坐北落亦王之爪牙故入奉期門而出寄分閫執  
憲總軍典屬乘障增爵益邑過厚恩深俄而六州羣寇  
相率大叛命公統隴右之騎濟河曲之師鋒鏑爭先玉  
石俱碎拜左武衛大將軍授一子官金銀器百事雜綵  
千段班師臨洮遘茲虐疾嗟乎匈奴未滅宿志不申生  
也有涯死而猶視蕃夷邊鎮血面摧心悲慘風雲號慟

山谷豈非良將視人如子人亦視猶父乎皇帝憫焉詔  
贈涼州都督米粟五百石錦帛五百段命都水使者張  
景佚備物護葬遵朝典也惟公氣猛而性和量寬而精  
銳沈謀可以掩著蔡雄斷可以奪鬼神故常糟粕韜鈴  
葛狗風角然其樹恩結信立威用武烜赫如風濤震盪  
如雷雨戰必克攻必取每有奏謁帝特稱歎孝文之得  
魏尚敵不足憂太祖之見郭嘉知成吾事前後錫錦衣  
寶帶文馬素女爛其盈門長鳴在殿感知已之主陳必

死之力皇情西顧則九羌疊鼓詔書北伐則六狄焚旗  
上成聖君之玄鑒下効武臣之素節其竟也如此其子  
咸善居喪而過哀或從王事而奪禮則知辛賢父子繼  
位將軍祭彤弟兄望參師律皇上念功以惜逝厚終以  
遇存有詔詞人為其碑誌介士送葬即封征虜之墳單  
于入朝當祭度遼之墓銘曰

洸洸將軍雄畧冠羣平西征北震戎懾獯亭障卧鼓屯  
田饋軍仗此白刃致彼青雲郭侯宴喜既多受祉玄牡

敬友清廟蠲祀鼎食金奏炮鼈膾鯉既來不庭有嚴天子流沙博望羽林飛騎河曲迴兵臨洮舊祉手握金節魂沈玉帳千里送喪三軍悽愴詔葬禮崇恩碑義豐生為神將死為鬼雄身世一滅榮華萬空祁連之墓長旌武功

撥川郡王神道碑

張說

珠玉無遠而登輦輅之飾寶也松栝無幽而入殿堂之構材也物貴其用人亦如之撥川王論方仁者源出於

疋未城吐蕃贊普之王族也曾祖贊祖尊父陵代相蕃  
國號為東贊戎言謂字曰論因而氏焉公有由余之深  
識日磾之先見陋偏荒之韋毳慕上國之衣冠聖歷二  
年以所統吐渾七千帳歸於我是歲吐蕃大下公勤兵  
境上縱諜招之其吐渾以論家世恩又曰仁人東矣從  
之者七千人朝家大勲授左玉鈐衛將軍封酒泉郡開  
國公食邑二千戶國語曰犬戎樹敦守終純固今其俗  
獷而輕死其法折而不撓故前代無降人中國無童僕

自公拔身向化首變華風澤潞之間始見我州矣若夫  
河南胡苑坰牧所利每歲冰合鐵騎是虞中軍必謀於  
元老亞將固選於時傑神龍三年以為朔方軍前鋒遊  
奕使景雲二年換右驍衛將軍開元五年兼歸德州都  
督使皆如故八年遷本衛大將軍改朔方節度副大使  
公之理兵也堅三甲一作革利五刃偶拳勇齊足力信賞  
罰分甘苦六轡如手千夫一心接獺獫猶蚊蚋卧沙塞  
猶衽席猶居露食垂二十年雨畢而成師冰泮而休卒

寒氣入於肌骨夜霜侵於鬢鬚人不堪其勤公不改其  
節韓公之建三城也公洗兵諾真之水刷馬中心之山  
以為外斥而叛徒安堵鄭卿之和默啜也公授館李陵  
之臺致饗光祿之塞以為內侯而賓至如歸九姓之亂  
單于也公四月度磧過白檉林收火拔部帳納多真種  
落彌川滿堦懷惠忘亡漠南諸軍避其計也降戶之叛  
河曲也公千騎奮擊萬騎奔走戡剪畧定師旅方旋而  
延陁蹶蹶復相嘯聚上軍敗於青岡元帥沒于赤柳澗

公越自新堡奔命寇塲贏糧之徒不滿五百兇醜四合  
衆寡萬倍公殺牛為壘敵敵為餉決命再宿衝潰重固

一作

連兵躡踵千里轉戰全薛公

一作合薛納

於河外反知

運於寇手朔方諸軍壯其戰矣研磨之奔也邀于黑山  
口覆其精銳布思之背也追至紅桃帳掩其輜重乳洎  
之會制蘭池之強敵木盤之役縲方渠之逋寇凡前後  
大戰數十小戰數百算無遺策兵有全勝是以六狄逃  
遁三垂久寧聲暴露於天下業光華於世載信皇威之



所加亦武臣之力也故錦衣寶玉允答成功甲第良田  
丕承王命帝錫其智効累其優寵黃頭黑齒比價齊名  
積戰多瘡累勞生疹恩命尚藥馳往診之晉豎已深秦  
醫無及及十一年四月十五日薨于位享年六十有六  
制贈為撥川王稱故國本其志也太常議謚曰忠由舊  
典昭其行也長子雲忠襲官封繼事業次子舊久特拜  
郎將十二年四月詔葬於京城之南懷遠人也太常鼓  
吹介士龍旂虎帳貂裘封犇殉馬吉凶之義舉夷夏之

物備長安令總徒以護事鴻臚卿士序賓以觀禮哀榮

之道著

一作極

矣君臣之義厚矣爰命國史立碑表墓吾

嘗同僚敢陳遺烈銘曰

黃河接天青海殊壤舉世安裕拔俗誰敢倬哉論侯利  
有攸往奮飛橫絕搏空直上以衆款塞因敵立勲吐渾

一作蕃

萬戶吟嘯成羣精感天地氣合風雲既封酒泉乃

位將軍朔方陰塞直秉獯虜帝命先鋒闢家虢虎上北

尸電

一作山北加電

漢南擊鼓數年之間耀國威武我有師旅

將軍鞠之我有邊氓將軍育之柳澗亡師一劍復之蘭池叛人三戰覆之武節方壯朝霧不待王爵送終宿恩未改時來世往人亡物在銘勲謚忠以告四海

右羽林將軍王公神道碑

張說

維大唐開元十五年九月二十三日庚申右羽林大將軍持節河西隴右兩道節度營田九姓轉運十副大使兼赤水大使專知節度事攝御史中丞判涼州都督上柱國晉昌公薨於鞏華亭故也夫事君効命之謂忠殺

敵榮親之謂勇士星襲月之謂氣逐日拔山之謂力有  
一於此名猶蓋代矧兼其四人何間焉是晉昌所以錯  
落將星崢嶸山嶽者也公諱君奭字威明瓜州常樂人  
也父壽因公建績致位九卿臨難守死褒贈特進審塞  
翁之倚伏達家叟之浮休老而益壯歿而名位者矣公  
威聲發於雷泉武義標於峒嶺小頭銳上猿臂虬髯龍  
劍推百勝之鋒蛇矛得萬人之敵拔自行軍果有呂蒙  
之才拜於壇場不爽韓信之用始仕鎮戍歷班外府及

郎將中郎至軍副率雖聚移官守而恒在疆場郭知運  
推轂河源握符隴外公未登一命事主將之旌麾不出  
十年代總戎之節鉞慷慨之士以為美談於是自驍衛  
將軍遷羽林大將軍既督隴右兼統河西綰塞垣之十  
軍佩節制之兩印大田多稼而屯廩百億蒐乘藉馬而  
鐵騎數萬乃蹈赤山焚薊幕獵青鳥驅犂牛喑鳴則七  
戎避勇烜赫則千里震動亭侯恃其長城廟堂賴其神  
將月獻戎捷歲行軍賞主侯無種屠狗起於將軍戰伐

有功爛羊超於都尉前後翻飛幕下奮躍行間跨軍曲  
郡腰金冠王者數十百人矣每至入朝奏謁升殿論邊  
山川險易立成於聚米攻守方畧一決於前籌遙詔置  
兵先合於漢光之旨親書從事暗同於魏武之心故得  
延譽上騰風雲鬱其氣色恩華下沓日月借其光輝當  
斯時也躊躇攘袂三垂可以氣壓百蠻可以力制即叙  
者老生之常談和親者豎儒之怯計安足為神武非常  
之主道哉誓請先收近寇次擊遠羌盡區域於西海闢

郡縣於北荒輝皇靈於天外圖壯節於雲閣其事如果  
曠古未儔惟君知臣俾斯言之可復何神與善負厥志  
而無成是年秋八月吐蕃犯邊瓜州失守盜憎吳將執  
政其親公以為背父立威非孝也頓兵縱敵非忠也大  
義逼而忘家方寸亂而供國其定計也成列而出討賊  
盡狄而退殺身忠在孝先將之道也公馳驛要謀而迴  
紇內叛以八九之從人當數百之強敵然猶虢瞰擊射  
殺傷畧半亭孤兵盡流矢橫及所謂朴而餘威折而不

撓矣嗟乎嘗膽之憤空結噉肝之怨莫讐天子聞之黯  
然興歎人言以命許國夫豈忘其言哉苟收必死之忠  
焉問不虞之過至矣蓋聖主推恕心於天下懸大信於  
後人愛欲其生戀晉侯再克之喜惡傷其歿抱秦伯猶  
用之誠婉獨見之端豈常情所逮謀臣飲恩於望表猛  
將感德於事外然後任人之固衆可知也乃下詔追贈  
特進荊州大都督禮命宅窆加常二等死事之經也公  
之伉儷曰武威郡夫人夏氏韓母築城之智孟光舉臼



之才拔棘解圍三軍懾其健婦崩城慟哭四海傷其孝  
妻此又兩間之一奇一家之兩絕者也嗣子尚衣奉御  
承榮天獎賜蘭星祥名寶禮義形於橋梓哀戚過於縗  
麻稟訓帷堂克持門戶特奉恩旨收其二廕飾柩玉闕  
歸魂上國以十六年十月詔葬於萬年縣見子之原鹵  
簿齊列方相雙引京尹護喪史官頌石千乘送葬觀驃  
騎之威儀十里開塋識龍驤之丘墓銘曰

合衆在仁正兵維義將為天目國命所寄曲乃老師輕

實兒戲安我封畧才難不易赴赴將軍貔貅絕羣超騰  
白地騫翥青雲朝盛勇爵時稱戰勲衆考飛舉帝曰予  
聞予聞伊何甲兵繕肅屯積萬庾馬量百谷甘心大敵  
指掌異族大軍當蹴單于可掬壯計先達王師未張城  
隳孤塞寇及高堂前忠後孝拒敵而忘外讐易復內變  
難防克日將戰呼天不假岑彭詐客張飛帳下流矢何  
人交錢去馬蒼黃反復哀哉命也美殮姑藏寵歸芷陽  
東都門外南登路傍高墳纍纍列樹行行父子同兆何

殊故鄉詔刻金石意形意氣隱善必書殤魂不諱事棄忠在生輕節貴嗟爾明靈銜恩永慰

唐元城府左果毅贈郎將葛公碑

張說

公諱威德字某曰葛氏京兆涇陽人也其先嬴姓咎繇之後夏有葛伯氏族興焉寧陵之傍尚傳侯國綏山之下獨有仙祠嬰則威服五城襲則績稱二縣鴻臚秀於吳會散騎崇於晉京集作景在其子孫是宜繁美公生而開朗長而英拔非因馬鄭之學動合禮經不待孫吳之

書暗同兵法有拳勇尚氣緊顧盼稜華風神都獎五馭  
善於東野六射勁於西霜少以嫖姚之才入光供奉之  
選御橋驂駕犯清蹕而不驚輦道啼鳥應鳴弓而自落  
便蕃左右星歲重深贈上柱國拜元城府左果毅天下  
大定李廣之用無施雲中薦賢馮唐之言已老春秋六  
十有五神功二年某月終於落師藁殯邙阜夫人太原  
郡王氏夫人郭氏實生大將軍福順一見聖主再紐乾  
綱重位冠乎北軍茂功藏乎南史故象服臨祭魚軒以

朝天子深嘉嘆馮勤之母羣公列拜賀虞潭之親享年七十有五薨於京兆之三真里公愛敬奉親軌則可移於後代義方訓子福祿來及於先人葬有日矣乃下制曰禮著飾終情惟悼往詢之前列抑有舊章前左羽林軍大將軍葛福順亡父某字某謙素弘此藝能未展才術奄從凋隕而嗣子克家式昭勲業旣念功以追遠亦自葉而流根宜伸獎贈俾慰泉壤可贈遊擊將軍守左驍衛翊府郎將開元九年二月九日葬我郎

將君暨前夫人王氏後夫人郭氏祔焉禮也章帝以遂  
輅旗在列廟食備其牲牢法葬陳其簫鼓孝慈之道著  
矣哀榮之禮備矣尋彼平生之事忽如絕光繫乎碑版  
之才永存遺烈銘曰

硜硜都尉角立傑堅神銳玉劒氣雄金鼓六藝爰設射

馭為武百行雖多

集作名

忠信為主時不兼命位不充才

善流慶答身謝榮來太原棣棣實惟嘉耦羽林桓桓克  
大其後

卽國長公主神道碑銘

張說

臣聞堯有娥英承九族之敦序舜有宵燭動百里之光  
耀大聖之後天必縱之積善之家神所慶矣豈惟上帝  
之女雲漢為靈平王之孫肅雍其德連華前志世有其  
人皇唐卽國長公主者睿宗之第七女也母曰崔國妃  
構累聖而成門各濟美而為室蘊乾坤之純粹演日月  
之清明神媛誕靈常言所絕免懷之歲天奪聖善不食  
三日哀比成人文母流胎教之慈曾子得生知之孝繇

是宮闈延矚邦國遠聞及乎玉笄耀首油輶在馭錫之  
美地邑以荆山求之令族嬪於薛氏爾其居翫圖史動  
修法度服其澣濯恭儉之教興鼓其琴瑟敬讓之風被  
其行已也安親惠下之謂仁敬宗好合之謂義降貴接  
卑之謂禮恕情周物之謂智推心而行罔不該備其理  
家也侍饌饗餼之均和主饋醴醕之品齊絲竹五音之  
徽靡纂組九華之縟麗經目所涉莫不精詣每至三元  
上賀五日中參進對詳華折旋舒婉故以式瞻貴里儀



範通門如千花之汎惠風百卉之涵膏露窈窕之儀克  
舉蕃衍之福大來有男子四女子五瑤碧生階芝蘭滿  
室也習禮明詩日漸庭闈之訓銀章艾綬地連恩澤之  
侯自先朝徽宸之辰迄今公主成笄之日外降過制內  
疾餘哀手寫金字梵經三部躬繡綵線佛像二鋪貝葉  
真偈現心相於銀鈎蓮花妙容呈意生於玉指孝思維  
則道遠乎哉開元繼明推恩由已進封鄯國長公主食  
邑一千二百戶田賦廣而彌儉禮秩尊而益恭其後君

子晨歌夫人晝哭未亡為稱生意盡矣撫視遺孤將守  
栢舟之誓志期剝落永從奈苑之游朝制斷恩改降鄭  
氏陵谷可移隋和之德不昧寒暑有遷松筠之性如一  
均養七子庥蔭二宗汾陰之室忘亡滎陽之黨相慶既  
而善福虛應寢疾彌留盡國醫之伎遠方畢至供御府  
之藥中使相望命之必至不可支也堂邑山林忽焉倖  
色平陽歌舞適足愁人開元十三年二月庚午薨於河  
南縣之修業里春秋三十有七震悼紫庭傷哀朱邱傾

家若墜舉國同悲有詔光祿卿孟溫禮監護喪葬京兆尹能延體副焉窆之禮一如涼國公主故事夏四月恩旨陪葬於橋陵不祔不從古之道也皇上念同氣之致美感閱川之永謝恨棣華之半缺悲瑤草之先化乃命國史昭銘懿迹降恩禮於雲露寫哀辭於金石水非湘渚還起帝子之祠山是洛陽即封天妹之冢銘曰帝系白雪仙源紫氣漲家成國承天作貴赫赫聖祖曰文曰武皇皇睿宗一變萬邦挺生淑媛慈和孝恭清臚

如神蛾眉無雙邸第立官湯沐建封爰及笄總禮施環  
珮鳴鳳獻祥乘龍擇對帝唐降女天乙歸妹珠玉過庭  
蘋蘩正內蛟門早閒龍湖忽上無地何載無天何仰金  
殿書經華絲繡像欲報之德昊天罔極孰是言歸良人  
永違銀鑪烟斷羅幕霜飛懇願毀形託身壞衣不諒人  
只改嬪他士奉命曰從從人曰順息媯繩楚懷羸霸晉  
反經合權與道同柄歸休二室均歡等潤四海謚清九  
族和平萬物向榮衆雖未成心戀盛明形隨落英祖載

鼎城歸窆咸京挽歌  
敷聲鹵簿凶行哀哀  
聖情惻惻同生橋山  
片石千秋令名

鄭國夫人神道碑

張說

鄭國夫人者弘農楊氏之女也開元十年三月終于通  
化里哀子銜血號哭仰訴怨報德之不待託思齊以永  
慕皇帝挹鑾殿之內憂悵鶴池之外慘揚淑聲而金石  
刻揭高行而天地感國史司文命為鄭志若清明下濟  
獄瀆上升祥惠德門慶育邦媛神授孝德之性天啓聰

達之心加以潤澤詩書游玩圖傳伯宗好直預誠將亡  
重耳羈遊先稱必霸豈知漢廷章奏假借仲長之才周  
官禮儀資稟宣父之學昌言嘉論有如此者螭首螭領  
脩眉橫波既工嚙笑易為容止肅恭而不跼舒和而不  
倨商周革命遇屯有怡懌之顏桑霍儼如在貴無驕矜  
之色端容一貌有如此者紘紕祭服闕翟朝衣纂組入  
神剪制驚國雕蒟之飯露葵之羹五齊六清三鸞七醢  
咸一見而洞理或不習而知和女工中饋有如此者惠

妃載誕皇子在者四人驪泉多龍丹穴多鳳克岐克嶷  
預見元凱之才實覃實訐蚤聞宵燭之艷亦關陰德之  
潛襲胎教之密傳乎又名子以義成家以禮忠者以令  
德為忠信者以不欺為信傳云去食存信信而有徵經  
云移孝為忠孝則不匱周宗咸服紀季獨存至德深圖  
有如此者辟司徒之妻邑其合禮南成侯之婦封其舊  
功况夫人慎徽四德四德咸舉經綸二儀二儀克從匿  
武收繼趙之勲產姚承配夏之慶吹凱風於椒掖外王

母於梧宮盛德大業窮光極寵啓國西鄭不亦宜乎十  
數年間二子榮立每至四時令節六參嘉會魚軒照門  
龜文交室為壽則珠貝山積侑幣則錦綺霞舒白玉滿  
堂聚姻親而同有黃金作穴散鄰里而無餘君子欽其  
市義聖人嘉其實儉故寢疾則飲食天厨湯藥御府匪  
日伊夕上宮絡繹於閨庭送終則威儀傾都車騎矚日  
自宮徂野中使相望於道路哀榮之盛書記罕聞猗歟  
所謂小君之遺美聖善之高烈者也如使後代考南史



議西陵披簡牘而嘆息臨山原而茫昧旌賁之道不期  
闕而然則外甥之碑武檐之石非明淑之壟其何所設  
焉辭成進御帝稱曰善顧謂尚札我其書之於是洒翰  
黃縑縷字青琬雲橫波蹙神變艷爛於山門鶴倚鸞翔  
生氣宛延於松路禮尊事絕恩徽迹遠斯又玄德動天  
幽誠迴日之奇致也誰昔未覩名言莫逮

延州豆盧使君萬泉縣主薛氏神道碑

張說

或稱達性命者齊生死之域違憂怖者一脩短之數斯

蓋無心之倫耳焉足與議於精哉何則雲虹滅彩辭人  
于是詠謠華秀從風君子為之嘆息豈不以對仙麗之  
景懷變化而遺戀在昭榮之節悼零落而徧憤吾見豆  
盧氏之子於其伉儷有焉縣主諱字姓薛氏河東汾陰  
人大父諱謹尚城陽公主考諱紹尚鎮國太平公主其  
在昔也夏有車正先封周有薛侯事長其在今也立宗  
姻于帝室重葉母于王姬河水經天上積星辰之氣霍  
山鎮地下多珠玉之林縣主幼而敏惠長而洵淑貞孝

義烈之傳吉凶賓祭之儀一聞成誦絃紉糾組之制涪  
毫醞羞之品一見懸解至乃鶴迴清泛蠶聚崩雲月酌  
玖砧花穠綵樹婦人能事成臻妙焉大聖天后鍊石補  
天有王母之神器分節列地啓弄孫之美邑封舊有禮  
義引而親封萬泉縣主天愛下流日新上簡乘龍之舉  
和鳳為難絡八紘以選門奄千官而求俊夫以龍圖帝  
寶祈步搖之華源虎戟侯門襲燕京之雄胄人之信美  
帝用嘉焉歸于豆盧氏六宮送行百僚供事迺以鑾輅

遺以翟車環珮晃旒璆然在御黼黻朱黛爛其盈門詔  
昏之禮於斯為盛爾乃移其愛敬以事舅姑伸其友恭  
以諧公妹舉宗洽比如鼓琴瑟每至婚姻會同少長咸  
集珎璜節步金翠耀首有婉孌之心無驕矜之色晞盼  
睐者若遲日之泛漣漪瞻詞氣者猶光風之轉蘅薄加  
以引納懷和餽分周賑疎屬自附窮歸忘窘故蘭行彰  
信於閨門而蕙風滿盈於邦國諒惟琬琰之性自美抑  
亦劬勞之訓致焉中宗孝和皇帝雲迴南土龍見東京


二儀更闢九族還叙望我兄兮公主贊陶鈞之力曰吾甥也縣主開井邑之賦縣主奉御天子巡遊宮觀觴樂池臺我有周親無時不從主家外幸比齊后而聯恩子婿中參與趙王而均禮或醉飽踰度寒燠未平何嘗不御藥在門王人接路當時厚澤莫之尚也奉御出為丹延二州刺史保傳下堂隨朱輪而同去輜輶入郡與皂蓋而齊飛辭宮闕兮歲闌戀庭闈兮日遠肥泉永歎邪氣攻衷楚祝招而不來秦醫來不及傾逝於延州之解

舍美玉褫顏明珠晦色平陽舊宇遂無望於歸寧懷縣  
新文空流連於永逝有子三人或齷或岐呱呱而泣天  
何以罰神其忍之歸葬於長安之洪瀆原窆窆營護有  
命加等器服祖遺率由舊章生之也榮死之也禮若夫  
柔加好治善之元也肅雍降貴謙之道也山河其德容  
潤廣也能羅其祥祚胤大也總衆美于脩嫜落驕暉於  
小年此所以哀中之又哀也昔袁亡馬氏蔡筆斯奮鄭  
喪曹姬潘文亦作矧茲內範事華無媿砥望夫之石以

表靈丘緝幼婦之辭將傳終古銘曰

薛之皇祖胄軒國禹相陰侯周氏其土宇英英白雲鬱  
彼河汾公門蕃衍銘鼎氣氲則仁則義則戚則勲餘慶  
介祉誕靈士女中宗之甥鎮國之子皎若霜雪華如桃  
李舜族爰叙堯封咸秩萬泉開賦三百其室守盛以儉  
居滿不溢亦既鳴雁宜爾家人謙恭下下撫納親親傾  
財致客對饁如賓我有邸第前臨黃道我有池塘却望  
青草漢輦停暮秦蕭拂早歲月易忘歡娛難保良人出

守將命北徂與子偕往飲別東都望母腸絕辭家淚枯  
露萎徑草霜酸衆雛魂兮何歸京師之野葬于何處杜  
陵之下巖巖雙闕列列行櫟勒是徽音永觀來者



文章辨體彙選卷六百八十三



# 欽定四庫全書

集部

文章辨體彙選卷六百八

四至

詳校官中書<sub>臣</sub>李 采

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>安宇樂

欽定四庫全書

文章辨體彙選卷六百八十四

明 賀復徵 編

墓碑二十

唐右將軍魏哲神道碑

唐楊炯

天經地緯之帝求制禮作樂之才撥亂反正之君資拔  
山超海之力繼韶夏而崇號謚非無陣戰之風披皇圖  
而稽文武或用干戈之道故能彌綸宗廟彈壓山川苞

四海以為家一六合而光宅是以二十八宿懸列將而  
察休徵三十五星聚天軍而赫符彩呂望垂竿於渭渚  
道峻匡周張良受策於圯橋功崇佐漢乃有心如鐵石  
氣若風雲洛讖書名河圖秘象青聯雷燭歷大塊以三  
休碧羽霜淒倚渾天而一息岑彭許允征南鎮北之名  
馮異王昌大樹中軍之號杜太行而泥函谷猛氣無前  
戮封豕而斬長鯨雄圖不測元戎十乘驅衛霍于前矛  
甲士三千列孫吳于後殿秋風白露執金鼓而齊六軍

太山黃河折銅符而光百代建廟堂之策為社稷之臣  
孰能與於此乎在我真將軍矣公諱哲字知人鉅鹿曲  
陽人也七代祖靖非前秦征北大將軍鎮北地上郡其  
後子孫因居於寧州襄樂縣開國承家之始誕姓命氏  
之源大名發於本文當途峻於層構三辰鬱鬱天街分  
畢昴之都九野茫茫地嶮列山河之境丞相以萬機論  
道匡大運以震威嚴尚書以八座當官贊金行而標領  
袖文昭武穆方駕齊驅公子王孫朱輪華轂大鵬垂翰

馭風伯而指南溟天馬騰姿偶雲師而集東道祖唐隋  
天水郡丞河陽都尉瑤林瓊樹擢標格以千尋圓折方  
流委波濤而萬頃雄飛有望豈惟京兆之丞陰德不憊  
何直丹陽之尉父寶皇朝通議大夫總管府司叅軍事  
東家孔子至德生於上天南國申侯明靈誕於中岳居  
朝翊贊道先王之法言公府弼諧對上天之休命若夫  
聖人作而萬物覩元首明而庶事康日月粲其光華山  
川鬱其雲雨則有英靈間出丹陵諧白獸之旌符瑞挺

生黑帝感蒼龍之傑隋珠一寸魏后揚眉和璧千金秦  
王動色顏生死庶聞於竹馬之年楊子參玄發自銅車  
之歲建情峰而直上疏筆海以橫流彫牆則百堵皆興  
峻宇則千門並列可大可久無忘簡易之途為子為臣  
率由忠孝之境郭林宗之披霧豈敢名言孔文舉之欽  
風每相推薦若乃五才並用誰能去兵七德兼施止戈  
為武出師於九天之上暗合兵書取法於十日之前懸  
符射法固以文武之道揄揚滿於城中將相之才籍甚

聞於海內貞觀十五年起家補國子博士喬林掃日驚  
白鳳於詞條壁水澄天駭雕龍於義壑班超慷慨常懷  
萬里之心李路平生每負三軍之氣十六年勅授左翊  
衛北門長上祿賜同京仍命為飛騎等講禮鄧司徒之  
舊事馬上讀書祭征虜之前聞營中習禮宮花如錦還  
臨拜將之壇槐葉成帷復對聞軍之市自皇王眷命大  
帝應期運璇衡而制八方調玉燭而臨四極玄菟白狼  
之野來奉衣簪蟠桃折木之鄉尚迷聲教太宗文皇帝

操斗極把鈎陳回百姓之心問三韓之罪勝殘去殺上  
馮宗廟之威禁暴戢兵下藉熊羆之用公丹心白刃本  
自輕生六郡三河由來重氣烏江討逆剖項籍於五陵  
涿野懲奸磔蚩尤於四宰二十年詔除游擊將軍右武  
侯信義府右果毅都尉長上如故顯慶二年以內憂解  
職痛深吳隱哀極顏丁躋厚地以崩魂訴高天如泣血  
紫泥垂煥頻降璽書墨纒臨戎遂從金革三年詔除左  
衛清官府左果毅都尉尋圉谷府折衝都尉並長上如



故又以應詔舉對策甲科遷左騎尉郎將于時長榆歷  
歷烽火猶驚高柳依依邊風尚急關山夜月遂為朔漠  
之秋西北浮雲翻作窮廬之景四年詔公為鐵勒道行  
軍總管陳兵玉塞按節金微學長山之蛇擬麗譙之鶴  
鐘鼓嘈囋上聞於天旌旗繽紛下蟠於地伏尸百萬因  
瀚海而藏舟闢地數千即燕山而築觀武臣雄畧氣懾  
西零神將宏圖威加北狄麟德元年詔遷左驍騎中郎  
將尋檢校右監門左武衛將軍本官如故昔者封禪陟

雲亭之後七十二君圖書出河洛以還三千餘歲振兵  
釋旅方崇薦帝之儀道洽功成必致禋天之禮粵以皇  
家闢統之五十年今上開基之十七載登封告禪玉牒  
金繩建顯號而施尊名揚英聲而騰茂實華夷輯睦皆  
承萬歲之恩朝野歡娛咸奉千年之慶乾封元年詔加  
明威將軍本官如故大風遺孽叛換青丘小水殘魂憑  
陵碧海率百官於文祖尚興彭蠡之師會萬國於塗山  
猶有防風之戮是歲也詔公為遼東道行軍總管營雄

對日兵氣橫天開玉堂而按部坐金城而勒陣關鞏之  
甲犀兕七重餘艘之船舳艫千里駕鼉梁於聖海秦皇  
息鞭石之威泛鰲鉤於仙洲愚吏罷移山之力然後風  
行雲卷斬將屠城塞丹浦之遙源伐黑林之奧本王孫  
公子名霑皂隸之臣深谷太山境入樵漁之園二年詔  
加上柱國仍檢校安東都護道之以德齊之以刑威振  
六官風揚五部兵戈載戢無勞尉侯之虞桴鼓希聞寧  
有穿窬之盜仰太陽而晞湛露方預四朝臨逝水而急

寒風俄悲一去齊孟嘗之下淚高榭曲池魯司寇之悲  
歌頽山壞木長安杳杳還符日近之言京兆悠悠理絕  
天高之間紫闕生入判自無期繡服危還竟知何日總  
章二年三月十六日遘疾薨于府第春秋五十有四嗚  
呼哀哉詔贈左監門將軍禮也惟公被服忠孝周旋禮  
樂仁者見之謂有仁知者見之謂有知研幾冊府金滕  
玉版之書索隱兵鈴玄女黃公之法每建旗推轂三令  
五申躬擐甲冑親當矢石軍井未建如臨盜水之源軍

竈未炊似對嗟來之食由是南馳北走東討西伐擲之  
無旁按之無下載匡宮裏遙登將軍之壇飛閣星邊獨  
列中軍之位雖龍泉匿字薰歌光沈而麟閣飛名天長  
地久夫人扶風氏隋濠州刺史圖之孫也五松春艷牽  
少女之祥風八桂秋雲降仙娥之寶魄謝家之子歌柳  
絮而知慙劉氏之妻頌椒花而自恥三周按禮無虧內  
則之風四德揚蕤載闡中閨之訓宿盤龍於月鏡早沒  
鸞床矯飛翼於霞樓先沈鳳穴珠星壁月終陪李子之

階金鼎銀鐫竟列齊侯之寢以貞觀十五年五月五日  
終于某所越咸亨元年某月日祔于某原長子瓜州司  
倉擇木次子右衛親衛玄封等門傳萬石庭列雙珠花  
萼爭榮芝蘭藹秀天經地義欽承避席之談日就月將  
虔奉趨庭之教變槐檀而瀝膽木石悲酸代露霜以崩  
心幽明感動葬之以禮祭之以時生民之本盡矣死生  
之義備矣孝子之事親終矣如是門生故吏共緝家聲  
才子聞人思傳盛德庶使蘭相如之壯氣歷千載而猶

存隨季子之餘風盡九原而可作其詞曰

文王受命畢公餘慶玉樹聯芳金枝疊映三分並列七  
雄齊競建國承家重熙累盛功宣舞蹈德流歌詠河洛  
垂文山川吐雲驪珠育照虹玉呈文直立孤聳天然不  
羣栖遲膠塾悅懌丘墳恥為儒者自許將軍伊祈不懌  
軒轅討逆陣擁遼河岳鎮碣石班超投翰揚雄執戟弓  
合三才刀長四尺爰清尉侯載洛疆場得人者昌失人  
者亡皇恩俾乂帝曰明敷幽桂含馥滋蘭吐芳承天待

詔觀國賓王茂實斯遠音聲克彰鵬池森漫雞山禍亂  
出閭辭家夷凶靜難金微瓦解玉亭冰泮扈駕命旋陪  
祠日觀萬邦胥悅千齡啟旦斗骨危城占蹄舉兵丸山  
霧塞渤海波驚帝赫斯怒王師有征虔劉北貌勘剪東  
明遵以文軌宣其德刑太微上將文昌貴相非熊非羆  
令聞令望寵踰軍幕榮參武帳本謂來朝何期返葬原  
野蕭瑟風烟悽愴天道如何吞恨者多松風夜響薤露  
晨歌秋月如練春波似羅榮華滅後寒暑經過青鳥丘





隴白馬山河

唐恒州刺史建昌公王公神道碑

楊炯

王氏之先代為佐命秦之霸也則王離滅楚國而三將  
連衡漢之興也則王陵誅項籍而五侯同拜南陽定命  
應圖讖而作司空西晉聿興合歌謠而濟天下昔者伊  
尹伊陟但保乂於商朝太公桓公惟夾輔於周室蕭何  
之後居食祿而無聞鄧禹之孫在當塗而不嗣未有夏  
殷三統金木五遷冊命重光軒表代襲則我瑯琊之郡

有冠蓋之里乎建昌之縣有公侯之子乎公諱義童字元稚其先瑯琊臨沂人也永嘉之末徙於江外皇運之始遷於五陵今為雍州萬年人也祖僧興齊會稽令梁安郡守南安縣開國侯祿位千石珪符五等營室迴於羽儀山河入於盟誓父方賒梁止閣主簿伏波將軍梁安郡守隋上儀同三司以惠和之性有文武之才伏波將軍從征等於馬援儀同三司開府均於鄧騭家餘積慶郡不乏賢代臨本州則元賓之父喜形於色繼為太

守則張翥之子送者如雲自齊國遜位於梁庭及隋人  
內禪於皇室夏禹之鼎寶命集於周朝御龍之家世祿  
歸於范氏公台階茂緒昴宿精靈五百歲之賢才一千  
里之皇佐忠規武節學府詞林元方閨門敬其有德少  
游鄉里稱其善人實惟清廟之器是曰皇居之寶韻諧  
金石奏虞廷之八音德合珪璋列塗山之萬國黃河一  
曲之水莫測其源赤城千丈之巖未階其峻羣童忽聚  
綴帛而引旂旗父老相呼授履而傳兵法隋授左勳衛

率非其好也漢東離析海內風塵天子溺於膠船諸侯  
問於金鼎能扶天下之危者必據天下之安能除天下  
之憂者必享天下之樂我高祖神堯皇帝就之如日望  
之如雲發三河之雷電平四海之歷象武王之仗黃鉞  
一月臨於孟津高帝之執朱旗五星會於東井公瞻烏  
於屋射隼於墉陳平則間行而去楚酈生則長揖而歸  
漢奉符繫組觀軹道之降王偃武修文見山陽之散馬  
初拜車騎將軍稍遷右屯衛將軍錄有功也考於周典

崇德報功稽於春秋策勲舍爵車騎萬隊備涼士之羌  
戎衛軍千兵掌京師之屯禁于時天下初定邊方未輯  
二十八舍尚有吳越之妖氛一十三州猶積東南之殺  
氣武德四年詔公為江南道招尉使鼓琴而送受命而  
行乘使者之輜車掌行人之旌節陸賈至于南海先責  
尉佗隨何入於九江即徵黥布詔除泉州都督封建昌  
縣男食邑三百戶斗牛星象舜禹精靈境接東甌地鄰  
南越言其寶利則玳瑁珠璣叙其風俗則丹雉白犬公

門容駟馬位列三刀防薏苡之譏嫌絕簡書之流謗豈  
直廣州清節酌貪泉於石門合浦神君返明珠於漲海  
貞觀三年詔遷散騎常侍行果州刺史授期天帝肇跡  
人皇南充國之舊都西巖渠之古邑岡巒紛糾天彭雙  
闕而作門珠貝浮沈巴水三迴而成字公入叅師友出  
居方伯金蟬右貂朱旗曲蓋纔臨蜀郡即聞來暮之歌  
初踐益州已聽中和之樂七年詔遷銀青光祿大夫行  
恒州刺史西街畢昴北岳恒山天開太乙之宮地列并

州之鎮境分靈壽魏將樂羊之所封邑對行唐趙王惠  
文之所築公政成期月風行萬里鄧晨一郡漢帝稱為  
主人李廣數年匈奴號為飛將行嘗計日郭伋不負於  
童兒郡異中平王觀無私於任子既道德而齊禮亦勝  
殘而去殺三禾在殿將拜鄭弘兩雁隨車坐悲虞國享  
年若干以十五年冬某日薨於洛陽之清化里公家傳  
將相世有忠貞屬離亂之弘多值風雷之草昧河宗兩  
日負鼎而謁成湯渭水七年垂釣而逢西伯將軍再命

刺史三遷仲冑藥巴牧人之良翰龐叅虞詡將帥之宏  
規立事於當年揚名於後代兄國印穀州刺史弟國稀  
仁州刺史荆枝擢秀棟華生光何止平輿之二龍是為  
賈家之三虎唐虞之際四岳分居趙魏之間八男為郡  
公雖勲叅締構位總班條金友玉昆良田廣宅而能吐  
食下士倒屣迎賓無笑客之美人有拜賓之童隸策名  
委質善始令終生當封侯克成丈夫之志死而可作無  
忘事君之道越十六年二月二日葬于伊闕縣之萬安



山詔賜雜物百段給儀仗往還禮也亭連長樂城枕高  
都守闕塞者汝寬適伊川者辛有北瞻洛汭尚想元亮  
之境東望邢山依然國僑之基夫人楊翟縣君河南褚  
氏即太常卿楊翟康侯亮之女中書令河南郡公遂良  
之妹也宋公子之流派褚先生之苗裔弘夫人之禮傳  
淑女之詩有文在手歸於魯國有鳳和鳴適於陳氏邑  
之石帘縣以封丘夫尊於朝妻貴於室仙人暫別可悲  
寡鶴之聲寶劍纔分終合雙龍之氣以某年月日薨於

某所越某年月日祔建昌公之舊兆長子師本太穆神  
皇后挽襲郎建昌公歷韓王府祭酒岐州司士參軍定  
州安喜縣令譽聞州里學富丘山以卿子而為郎以象  
賢而開國朝遊楚澤暮宿燕宮東臨石柱雍為積高之  
地古會長星唐是中山之邑出遊鄰國不以陪臣見朝  
上謁邦君不以屬官相待洛陽朝覲適見雙鳧東都墓  
田行悲駟馬以年月日終於某所越某年月日即陪葬  
於先兆次子師表左千牛備身遷尚輦直長歷許州臨

穎博州堂邑滄州樂陵縣州萬安果州西充五縣令能  
傳祖業克嗣家聲有言偃之文章兼仲由之政事晨陪  
紫極應鈎陳之六星旦奉黃麾屯玉車之千乘至若繁  
昌土宇魏文帝之壇壇堂邑隄封漢陳嬰之侯國河分  
九道渤海東臨江派五津崑崙北指莫不愛人以禮為  
政以德鍾離意之禁暴不用尺刀公孫述之有神能持  
五縣次子師玄雋州都督府臺徵縣丞次子師楚夔州  
都督府雲安縣令芝蘭有秀羔雁成行滇北數十尹莫

大印都之縣邑東七百里惟有巫山之峽言其縣職黃  
龍入於闕門叙其宰人鸞鳥翔於學舍咸能生盡其孝  
喪盡其哀積粟萬鍾思負米而何得棖題三尺泣吾親  
而不見卜其宅兆麟鳳匝其岡巒陳其簞簋春秋變其  
霜露思傳舊德式建豐碑戴安道作頌於鄭玄蔡伯喈  
披文於郭泰魏武王讀而稱妙非所望焉夏侯湛見而  
陋之固其宜也

益州溫江縣令任君神道碑

楊炯

漢丞相之尊官大位秉車滿於十人齊景公之利用厚生有馬盈於千駟羽旄冠劍擬金鳴玉疊其前苑囿池臺清歌妙舞喧其後崇高在於寵祿大欲存於食貨義然後取橫玉帶以當仁道不虛行坐鹽梅而自得若乃時之不與數之不通貴賤任於天窮通由於命左太冲之詠史下寮實英俊之揚嵇叔夜之著書賤職為老莊之地雖復勢力以高下相懸尊卑以商周不敵孔宣父中都之小宰幽厲多謝於陪臣陳仲弓太丘之一官公

卿有勲於縣長是以德成者上道在斯尊陶潛則安枕  
北窓言偃則鳴絃東武柳楊足以儀四海顧盼足以破  
三軍代有人焉於斯為盛公諱晃樂安博昌人也其後  
因官遂家蒲州之永樂天子令德軒皇為誕姓之源諸  
侯計功薛國在宗盟之後西京執法則有御史大夫東  
漢循良則有會稽都尉任光鄉里之忠厚任隗朝臣之  
鯁直益州從事術數知名臨海真人清貞克已況乎東  
西海岱強齊九合之都表裏山河全晉三分之國車馬

雷駭衣冠鼎盛盟書百代可謂功臣遷徙丘陵實惟豪  
族曾祖顯祖熙考憬並策名天爵獨步人師懷素履之  
幽貞保黃裳之元吉張家碑碣荊州有七代孝廉荀氏  
鄉亭潁川有八人才子君外資剛健內育文明合千載  
聖賢之間鍾五行金木之秀王恭濯濯春柳懷風和嶠  
森森寒松列景有曾參之孝有史魚之直有子夏之文  
有冉求之藝先王德行固名言而在茲大聖溫良亦顛  
沛而於是當朝一見許其王佐之才行路相逢知其美

人之贈解褐為家令寺主簿天王太子之位赫赫前星  
天地長男之宮巖巖左闕出身事主元良永固於萬邦  
束髮登朝七鬯不驚於百里秩滿授將作監主簿千門  
萬戶張華窮壯麗之圖東主西賓班固致謳謠之實職  
掌宮觀是名將作大司馬桓溫之府績用在於元琳大  
將軍竇憲之曹文章寄於亭伯累遷右衛長史南京左  
掖上將陪藩北落師門天軍例衛東觀漢記梁統有清  
白之名中興晉書薛兼有恪勤之譽詔遷朝散大夫行



益州溫江縣令華陽西極漢水東流背面通秦越之鄉  
左右夾巴涼之地風烟可接懸車束馬之山雲物潛通  
織女牽牛之象神仙所宅則有二十四居途路所經則  
有五千餘里金城石郭還聞上代之風國富人安時聽  
中和之樂於是乎龍泉獨斷龜旒旁求品命千名封疆  
萬戶暫過云亭乘軒之望可知且詣中軍理劇之才有  
屬旌孝弟勤農桑省徭役育鰥寡所以一縣稱平所以  
百城尤最蕭育是杜陵男子不入後曹黃浮非鄉里所

知不寬同歲洛陽行馬門士無心齊國池魚權家絕望  
豈惟縛柱鞭絲操刀製錦巫馬期之任力弊起乘星鍾  
離意之悅人災生解土享年五十有九以鳳儀二年六  
月二十五日卒於官第夫人姚氏徵士神人之女也壽  
丘僊葉媯水靈苗定姚信之機衡審姚光之術藝明星  
燄燄不臨太丘之前暮雨沈沈不散巫山之曲婦人謂  
嫁曰歸女子有行纖絳組紉棗脩榛栗南斗千齡之匣  
忽愴沈江北方三代之儀終悲共穴先以咸亨三年七

月二日終西京翊善里之私第越儀鳳三年冬十一月  
一日歸祔於永樂縣歷山之平原卜虞芮之閒田帶關  
河之設險居人致祭桐鄉有朱邑之祠怪力成墳葉縣  
有王喬之墓君燕趙奇士神仙中人容貌魁梧衣冠甚  
偉揚子雲之窮巷好事來遊段干木之閤居通侯展敬  
自陳力就列居家可移妾本絕於織蒲馬無聞於食粟  
原子思之厚秩偏給鄉人孔文舉之中鎔延留坐客加  
以徧觀國史尤精釋教夢幻泡電知一切之皆空園林

貨財見三陽之已淨遭時屯坎浮生蹇剝佳人不再荀  
奉倩之傷神赤子無期潘安仁之慘慟天乎到此命也  
如何及其瞑目少城歸懷舊壤平原古樹惟餘孺子之  
墳春露秋霜非復皐繇之祀於是鄉鄰作主朋友如麻  
撰德銘之於素表披文刻之於翠石魯哀公作仲尼之  
誅天不愆遺蔡伯喈為有道之碑人無媿色其銘曰

軒帝之族漢朝之臣西州智士東海真人豪傑天縮衣  
冠日新實生其德必有其鄰道在為貴知幾則神氣衝

南斗價直西秦大蒙之信太平之仁辨窮非馬學究成  
麟孝友為政觀光利賓重朋比德少海為春宮室之象  
南斗北辰甲兵之衛閭闔鉤陳山控金馬江迴玉輪天  
文井絡地紀梁岷庭前置水甌內生塵園盤有繭野雉  
來馴時命屯蹇生涯苦辛實叙虛贈玉樹長淪厚德無  
輔清仁不親百年天枉一旦歸真雷鳴之下長河之濱  
旌旄委鬱徒御逡巡悲風泊起血下霑巾死而可贖人  
百其身

唐贈范陽大都督忠烈公李公神道碑

楊炎

秦霸也張祿去魏漢興也淮陰離楚龍鳴風雨之會蛇  
變泥蟠之中逶迤感通精氣相合斯冥契也豈人力也  
皇唐贈司空范陽大都督李公諱楷其本出於隴西八  
代祖節後魏雁門太守燕齊之亂族沒鮮卑東遷號良  
將之家北郭實大人之種其生勃碣其居戴斗海塞迴  
抱興公之氣天星下直為公之祥英氣混茫能據龍驤  
望其形得山河之狀覩其銳見金鼓之威神明為徒義

勇為器久視中以驍騎歲入于遼西臨太原南震燕趙  
雲火照于河上天兵宿于北門朝廷憂之有命招諭合  
以信誓際于天人話言感寤撫劔歎息是歲以控弦之  
士七百騎垂橐入塞解甲來朝以其本枝復賜李氏授  
玉鈐衛將軍左奉宸內供奉圖形雲閣之中置酒蓬萊  
之上君臣相賀羽衛生光君子曰井谷不可以游龜龍  
蟻垤不可以戴松柏漢于是始靖敵于是始憂是後殪  
靺鞨于鴨綠之野挺矛戟于榆關之外北出障塞懷其

王庭南救河源復其死地石壑之役以一旅定三軍冷  
陪之師以虛聲鼓精勁東封之歲外將天軍河湟未寧  
西護監牧雲麾鐵騎山動地踊右據清海北登狼山水  
泮則會師風高則出塞皇威振于四海王化敷于無外  
故得大命三錫天馬輅駟定國難者兩朝拖侯服者四  
紀會兵車者百勝出帳下者千人國有事未嘗不勤勞  
無私可謂知禮於戲天道曖昧胡星未殞以營平之年  
不終大用以伏波之病再出窮荒天寶元年五月二十



日自河源薨于懷遠縣之師次春秋六十七贈營府都督明年詔葬于富平縣壇山原維公智之大寶神之異門心和體剛慮遠精徹思乎耳目之外行乎變化之中震呼戎獫嘯吒風雲貔虎之悍以禮成百萬之強以謀勝故鮮卑因之以疲中國天后取之以空大漠于中宗開朔方之地四百里于睿宗食佐命之邑三千户于玄宗則主禁衛吞諸戎東西南北動罔不尅禦戎安邊凡十命焉祚于後也負河圖以列四星遇英主而當三傑

肅宗之功復區宇更為桓文今上之道訓華夷並為召  
畢乾元中天子以公炳德丕赫積仁流慶大福再成沒  
而不朽乃命太常追考功績謚曰忠烈贈司空范陽大  
都督夫人贈號韓國夫人于是建廟堂命宗紀室有山  
龍之服樂有鍾石之和

雲麾將軍郭公神道碑

楊炎

山之西出將地之右主兵故前有辛李之榮後稱周郭  
之盛四族者貌武其人風雲其氣出入千載戎狄憂之

皇唐一宇宙之初數蠻夷之罪太白上而天兵利陰精  
盛而神將出於是郭氏之室世並五侯丹華轂者三十  
人分采地者三千戶劔騎鼎食氣蓋關山開閭而珠履  
成行宴享而山玄滿座中興之後鴻臚間出始提一劔  
而震清海一作漢海年未三十名冠雲臺位為國之長君身  
主人之大命銘旂羽葆小韓侯之故事龍旂青社增召  
伯之舊封則祖宗之盛未始聞也鴻臚即世關隴不震  
天其永思戡定之代故盛業集于金吾金吾名千里即

鴻臚之孫出於荆藍之中長於松柏之下虎頭駢脅曲  
踊雷聲猿臂過挾朝之材鷹揚表下韞之志始以將門  
子往還隴上開元中西討石國負羽先登特拜游擊將  
軍折衝都尉駕龍媒於殷路舞雙劍於前席二十六載  
詔公與中使劉元復開慈嶺以功勝敵不能軍班師授  
左武衛將軍特賜衣甲一副超才也後五載有苑門之  
後走射鵬之羣拜左衛將軍嶺巖人陣既成列而破石  
城天險不待戰而降累遷左金吾衛大將軍驟兼玉門

軍使未行而遇疾嗟呼病至刮骨志屈噉肝累喉白刃之中垂翅青雲之上以天寶十一載二月薨于武威之第春秋若干夫人弘農郡君楊氏絳郡長史之孫臨洮軍使雲之女河華茂氣齊姜盛族知疑作和于鳴鳳而外

姻致駕宜爾幹母而君子好逑始於龍劍雙飛中而雲虹獨感春秋若干有子一人曰某某毅都尉山西將種塞下雄兒周郎之豪勇冠軍終子之精魂先返年二十一先公而夭郭氏本自周王之穆其在昔也漢有司徒

司空魏有車騎驃騎或竹馬垂信或金玉

疑作穴

稱豪世

后佐漢以補天賢王築館而為道其在今也一門三戟  
六乘七侯伊吾反昭於前鴻臚特坐於後長河萬里敵  
國四方每賓祭往來蒐除大閱望帶裳者知宗廟之盛  
執金鼓者成父子之軍世德後來公其濟美則勲配祀  
典中乏主祭之名哀反路人內無朝哭之位此窈窕之  
數孰可問哉猶子子鸞善達禮以繼門族樂主辨以濟  
險艱荀令君為不亡趙將軍其有子以十三載某月葬

我公于武威東原非緩也實卜年龍蟠天井岡伏山形  
閱星象於玄宮起風烟於松闕將軍鼓吹迴過細柳之  
營天子輅車出祖茂陵之道銘曰

壯哉強魂凜然風雨一劍剗鯨空拳搏虎錫以翻鼓艘  
舳舻滄駢騎佩組革彼壯姜揄狄珣璜言念君子乃心  
無忘精返太白魂歸故鄉雙墳巍然流水湯湯秦雲如  
牛礪石如羊二龍於此父子同岡

文章辨體彙選卷六百八十四

欽定四庫全書

文章辨體彙選卷六百八十五

明 賀復徵 編

墓碑二十一 碑銘

昭容上官氏碑銘 唐蘇頌

天降時雨山川出雲乃生靈媛祚我聖君精微其道煥  
炳其文三光錯行昭容綱紀百揆繁會昭容條理外圖  
邦正內諗天子憂在進賢思皇 集作求 多士忠孝必 集作心



感天焉報之吉凶有數丘焉禱之如彼九日羿焉報之  
如彼三良秦焉悼之漢宮選材班氏其特楚史書霸樊  
妹之力或穆齊公叙明其德嗟爾彤管是鑒是則

唐故德儀贈淑妃皇甫氏神道碑銘

杜甫

積氣之清積陰之靈漢曲迴月高堂麗星驚濤洶洶過  
雲漠漠洗滌蒼翠誕生娉婷婉彼柔惠迴然開爽綢繆  
之故昔在明兩恩渥未渝康哉大往展如之媛孰與  
爭長珩珮是加翬褕克備先德後已累功居位壺儀

孔修宮教咸遂天子獎飾禮亦尊異小苑春深離宮  
夜逼花間度月同輦未歸池畔臨風焚香不息嗚呼變  
化惠好終極馮相視祿太史書氛藏舟晦色逝水寒  
文翠幄成彩金爐罷燠燕趙一馬瀟湘片雲恍惚餘  
跡蒼芒具美王子國除匪他之恥公主愁色永懷於彼  
日居月諸丘隴荆杞巖巖禹鑿瀾瀾伊川列樹拱矣  
豐碑歸然爰謀作述欵就彫鐫金石照地蛟龍下天  
少室東立繚垣西走佛寺在前宮牆在後維山有麓與

碑不朽維水有源與詞永久

唐故常州刺史獨孤公神道碑銘

崔佑甫

常州之孝行為大蒸蒸翼翼以敬以愛友于兄弟如捧  
如戴常州之義篤于友用之有常行之可久扶危拯溺  
爾身我手常州之才施于政撫柔三部以仁為柄龔遂  
國嶠千古迭映常州之文究其本質取其正艷從其損  
在星之緯在衣之袞常州之年止中身去昭昭之盛世  
與萬鬼而為鄰白馬江上青鳥洛濱鵲鵲在原嗟爾元

昆縑經霜血長號訴冤纂述遺美謂余不謬我覲之子  
將二十年相投藥石胡疹不痊譬我于池子為之泉譬  
我于桐子為之弦榮不獨遂難不隻全如何淑明摧馥  
碎堅廬衣楚挽徘徊墓田望之不見赴之無緣狸首斑  
如女手拳如天如天如泣涕漣如

文章辨體彙選卷六百八十五

欽定四庫全書

文章辨體彙選卷六百八十六

明 賀復徵 編

墓表一

以下正體

徐師曾曰按墓表自東漢始安帝元初元年立謁者  
景君墓表其文體與碑碣同以其樹於神道故又稱  
神道表其為文有正體有變體又有阡表并附於末  
則遡流而窮源也蓋阡墓道也

集賢校理丁君墓表

宋歐陽修

君諱寶臣字元珍姓丁氏常州晉陵人也景祐元年舉  
進士及第為峽州軍事判官淮南節度掌書記杭州觀  
察判官改太子中允知剡縣徙知端州遷太常丞博士  
坐海賊儂智高陷城失守奪一官徙置黃州久之復得  
太常丞監湖州酒稅又復博士知諸暨縣編校秘閣書  
籍遂為校理同知太常禮院君為人外和怡而內謹立  
望其容貌進趨知其君子人也居鄉里以文行稱少孤

與其兄篤於友悌兄亡服喪三年曰吾不幸幼失其親  
兄吾父也慶厯中詔天下大興學校東南多學者而湖  
杭尤盛君居杭學為教授以其素所學問而自修於鄉  
里者教其徒久而學者多所成就其後天子患館閣職  
廢特置編校八員其選甚精乃自諸暨召居秘閣君治  
州縣聽決精明賦役有法民畏信而便安之其始治剡  
也如此後治諸暨剡鄰邑也其民聞其來謹曰此剡人  
愛而思之謂不可復得者也今吾民乃幸而得之而君



亦以治剝者治之由是所至有聲及居閣下淡然不以  
勢利動其心未嘗走謁公卿與諸學士羣居恂恂人皆  
愛親之蓋其召自諸暨也以材行選及在館閣久而朝  
廷益知其賢英宗每論人物屢稱之國家自削除僭偽東  
南遂無事偃兵弛備者六十餘年矣而嶺外尤甚其山  
海荒闊列郡數十皆為下州朝廷命吏常以一縣視之  
故其守無城其戍無兵一日智高乘不備陷邕州殺將  
吏有衆萬餘人順流而下得梧封康諸小州所過如破

竹吏民皆望而散走獨君猶率羸卒百餘拒戰殺六七人既敗亦走初賊未至君語其下曰幸得兵數千人伏小湘峽扼至險以擊驕兵可必勝也乃請兵于廣州凡九請不報又嘗得賊覘者一人斬之賊既平議者以君文學宜居臺閣備侍從以承顧問而眇然以一儒者守空城提百十饑羸之卒當萬人卒至之賊可謂不幸而天子亦以謂縣官不素設備而責守吏不以空手捍賊宜原其情故一切輕其法而君以嘗請兵不得又能拒

戰殺賊則又輕之故他失守者皆奪兩官而君奪一官  
已而知其賢復召用後十餘年御史知雜蘇家受命之  
明日建言請復治君前事奪其職而黜之天子知其賢  
不可以一眚廢而先帝已察其罪而輕之矣又數更大  
赦且罪無再生然猶以御史新用故屈君使少避而不  
傷之也乃用其校理歲滿所當得者即以君通判永州  
方待闕於晉陵以治平四年四月某甲子暴中風眩一  
夕卒享年五十有八累官至尚書司封員外郎階朝奉

郎勲上輕車都尉曾祖諱某祖諱某皆不仕父諱某贈  
尚書工部侍郎母張氏仙遊縣太君君娶饒氏封晉陵  
縣君先卒子男四人曰隅曰除曰濟皆舉進士曰恩兒  
才一歲女一人適著作佐郎集賢校理胡宗愈君既卒  
天子憫然推恩錄其子隅為太廟齋郎君之生平履憂  
患而遭困阨處之安焉未嘗見戚戚之色其於窮達壽  
夭知有命固無憾於其心然知君之賢哀其志而惜其  
命止於斯者不能無恨也於是相與論著君之大節伐

石紀辭以表見于後世庶幾以慰其思焉熙寧元年六月十四日廬陵歐陽修述

尚書屯田員外郎張君墓表

歐陽修

君諱谷字應之世為開封尉氏人曾祖節祖遇皆不仕父炳為鄭州原武縣主簿因留家焉今為原武人也君舉進士及第為河陽河南主簿蘇州觀察推官開封府士曹參軍遷著作佐郎知陽武縣通判宿州累官屯田員外郎復知陽武縣以疾致仕卒于家享年五十有九

君為人剛介好學問事父母孝與朋友信其為吏潔廉所至有能稱其在河南時予為西京留守推官與謝希聲尹師魯同在一府其所與遊雖他掾屬賓客多才賢少壯馳騁于一時而君居其間年尚少獨苦羸病肺唾血者已十餘年幸其疾少間輒亦從諸君飲酒諸君愛而止之君曰我豈久生者耶雖他人視君亦若不能勝朝夕者其後同府之人皆解去而希聲師魯與當時少壯馳騁者喪其十八九而君癯然唾血如故後二十年

始以疾卒君雖病羸而力自為善居官為吏未嘗廢學問多為賢士大夫所知乃知夫康強者不可恃以久而羸弱者未必不能生雖其遲速長短相去幾何而強者不自勉或死而泯滅于無聞弱者能自力則必有稱于後世君其是已君嘗謂予曰吾旦暮人耳無所取于世也尚何區區於仕哉然吾嘗哀祿之及于親者薄若幸得不死而官登于朝冀得國家褒贈之寵以榮其親然後歸病于原武之廬足矣乃益買田治室於原武以待

君自河南蘇州累為名公卿所薦乃遷著作為郎官贈其父太子中允母宋氏京兆縣太君於是遂致仕歸于原武營其德政鄉之張固村原將葬其親卜以皇祐五年十一月某日用事前四日君亦卒遂以某日從葬于原上子與君遊久記其昔所謂予者且哀君之賢而不幸又嘉君之志信而有成於其葬也不及銘乃表於其墓君娶祝氏封華陽縣君有子曰損試將作監主簿至和二年三月七日翰林學士尚書吏部郎中知制誥充



史館修撰歐陽修撰

太常博士周君墓表

歐陽修

有篤行君子曰周君者孝于其親友于其兄弟居父母  
喪與其兄某弟某居于倚廬不飲酒食肉者三年其言  
必戚其哭必哀除喪而癯然不能勝人事者蓋久而後  
復自孔子在魯而魯人不能行三年之喪其弟子疑以  
為問則非魯而他國可知也孔子歿而其後世又可知  
也今世之人知事其親者多矣或居喪而不哀者有矣

生能事而死能哀或不知喪禮者有矣或知禮而以謂喪主於哀而已不必合於禮者有矣如周君者事生盡孝居喪盡哀而以禮者也禮之失久矣喪禮尤廢也今之居喪者唯仕宦婚嫁聽樂不為此特法令之所禁爾其哀麻之數哭泣之節居處之別飲食之變皆莫知夫有禮也在上位者不以身率其下在下者無所望於其上其遂廢矣乎故吾於周君有所取也君諱堯卿字子俞道州永明縣人也天聖二年舉進士累官至太常博

士歷連衡二州司理叅軍桂州司錄知高安寧化二縣  
通判饒州未行以慶厯五年六月朔日卒于朝集之舍  
享年五十有一皇祐五年某月日葬於道州永明縣之  
紫微岡曾祖諱某祖諱某父諱某贈某官母唐氏封某  
縣太君娶某氏封某縣君君學長于毛鄭詩左氏春秋  
家貧不事生產喜聚書居官祿雖薄常分俸以贖宗族  
朋友人有慢已者皆厚為禮以媿之其為吏所居皆有  
能政有文集二十卷君有子七人曰諭鼎州司理叅軍

曰詵湖州歸安主簿曰謚曰諷曰諲曰說曰誼皆未仕  
嗚呼孝非一家之行也所以移于事君而忠仁于宗族  
而睦交於朋友而信始于一鄉推之四海表于金石示  
之後世而勸考君之所施者無不可以書也豈獨俾其  
子孫之不隕也哉

永春縣令歐君墓表 歐陽脩

君諱慶字貽孫姓歐氏其上世為韶州曲江人後徙均  
州之鄖鄉又徙襄州之穀城乾德二年分穀城之陰城

鎮為乾德縣建光化軍歐氏遂為乾德人修嘗為其縣令問其故老鄉閭之賢者皆曰有三人焉其一人曰太傅贈太師中書令鄧文懿公其一人曰尚書屯田郎中戴國忠其一人曰歐君也三人者學問出處未嘗一日不同其忠信篤于朋友孝悌稱于宗族禮義達于鄉閭乾德之人初未識學者見此三人皆尊禮而親愛之既而皆以進士舉于鄉里而君獨黜于有司後二十年始以同三禮出身為潭州湘潭主簿陳州司法叅軍監考

城酒稅遷彭州軍事推官知泉州永春縣事而鄧公已  
貴顯於朝君尚為州縣吏所至上官多鄧公故舊君絕  
口不復道前事至終其去不知君為鄧公友也君為吏  
廉貧宗族之孤幼者皆養于家居鄉里有訟者多就君  
決曲直得一言遂不復爭人至于今傳之嗟夫三人之  
為道無所不同至其窮達何其異也而三人者未嘗有  
動於其心雖乾德之人稱三人者亦不以貴賤為異則  
其幸不幸豈足為三人者道哉然而達者昭顯于一時

而窮者泯沒于無述則為善者何以勸而後世之來者  
何以考德于其先故表其墓以示其子孫君有子世英  
為鄧城縣令世勛舉進士君以天聖七年卒享年六十  
有四葬乾德之西北廣節山之原

石曼卿墓表

歐陽修

曼卿諱延年姓石氏其上世為幽州人幽州入于契丹  
其祖自成始以其族間走南歸天子嘉其來將祿之不  
可乃家于宋州之宋城父諱補之官至太常博士幽燕

俗勁武而曼卿少亦以氣自豪讀書不治章句獨慕古人奇節偉行非常之功視世俗屑屑無足動其意者自顧不合於時乃一混於酒然好劇飲大醉頽然自放由是益與時不合而人之從其遊者皆知愛曼卿落落可奇而不知其才之有以用也年四十八康定二年二月四日以太子中允秘閣校理卒于京師曼卿少舉進士不第真宗推恩三舉進士皆補奉職曼卿初不肯就張文節公素奇之謂曰母老乃擇祿耶曼卿矍然起就之



遷殿直久之改太常寺太祝知濟州金鄉縣歎曰此亦  
可以為政也縣有治聲通判乾寧軍丁母永安縣君李  
氏憂服除通判永靜軍皆有能名充館閣校勘累遷大  
理寺丞通判海州還為校理莊獻明肅太后臨朝曼卿  
上書請還政天子其後太后崩范諷以言見幸引嘗言  
太后事者遽得顯官欲引曼卿曼卿固止之乃已自契  
丹通中國德明盡有河南而臣屬遂務休兵養息天下  
晏然內外弛武三十餘年曼卿上書言十事不報已而

元昊反西方用兵始思其言召見稍用其說籍河北河東陝西之民得鄉兵數十萬曼卿奉使籍兵河東還稱旨賜緋衣銀魚天子方思盡其才而且病矣既而聞邊將有欲以鄉兵捍賊者笑曰此得吾粗也夫不教之兵勇怯相雜若怯者見敵而動則勇者亦率而潰矣今或不暇教不若募其敢行者則人人皆勝兵也其視世事蔑若不足為及聽其施設之方雖精思深慮不能過也狀貌偉然喜酒自豪若不可繩以法度退而質其平生

取舍大節無一悖於理者遇人無賢愚皆盡忻懽及可  
否天下是非善惡當其意者無幾人其為文章勁健稱  
其意氣有子濟滋天子聞其喪官其一子使祿其家既  
卒之三十七日葬於太清之先塋其友歐陽修表於其  
墓曰

嗚呼曼卿寧自混以為高不少屈以合世可謂自重之  
士矣士之所負者愈大則其自顧也愈重自顧愈重則  
其合愈難然欲與共大事立奇功非得難合自重之士

不可為也古之魁雄之人未始不負高世之志故寧或毀身污節卒困于無聞或老且死而幸一遇猶克少施于世若曼卿者非徒與世難合而不克所施亦其不幸不得至乎中壽其命也夫其可哀也夫

內殿崇班薛君墓表

歐陽修

公諱塾字宗道姓薛氏資政殿學士兵部尚書簡肅公之弟薛之世德終始有簡肅公之誌與碑公官至內殿崇班以某年某月某日卒官于蜀州其子仲孺以其喪

歸葬于絳州之正平先葬而來乞銘以誌予幸嘗紀次  
簡肅公之德而又得銘公其銘曰公躬直清官以材稱  
惟賢是似不愧其兄既葬而仲孺又來請曰銘之藏誠  
以永吾先君于不朽然不若碣于隧以表見于世之昭  
昭也予惟薛氏于絳為著姓簡肅公于公為兄弟而公  
之世德予既見之銘而其子又欲碣以昭顯于世可謂  
孝矣然予考古所謂賢人君子功臣烈士之所以銘見  
于後世者其言簡而著及後世哀言者自疑于不信始

繁其文而猶患於不彰又脩其行事惟恐不為世之信也若薛氏之著于絳簡肅公之信于天下而予之銘公不愧于其兄則公之銘不待繁言而信也然其行事終始予亦不敢略而誌諸墓矣今之碣者無以加焉則取其可以簡而著者書之以慰其子之孝思而信于絳之人云

河南府司錄張君墓表

歐陽修

故大理寺丞河南府司錄張君諱汝士字堯夫開封襄

邑人也明道二年八月壬寅以疾卒于官享年三十有七卒之七日葬洛陽北邙山下其友人河南尹師魯誌其墓而廬陵歐陽修為之銘以其葬之速也不能刻石乃得金谷古甌命太原王顧以丹為隸書納于礪中嘉祐二年某月某日其子吉甫山甫改葬君于伊闕之教忠鄉積慶里君之始葬北邙也吉甫纔數歲而山甫始生余及送者相與臨穴視窆且封哭而去今年春余主試天下貢士而山甫以進士試禮部乃來告以將改葬

其先君因出銘以示余蓋君之卒離今二十有五年矣  
初天聖明道之間錢文僖公守河南公王家子特以文  
學仕至貴顯所至多招集文士而河南吏屬適皆當時  
賢材知名士故其幕府號為天下之盛君其一人也文  
僖公善待士未嘗責以吏職而河南又多名山水竹林  
茂樹奇花怪石其平臺清池上下荒墟草莽之間余得  
日從賢人長者賦詩飲酒以為樂而君為人靜默脩潔  
常坐府治事省文書尤盡心於獄訟初以辟為其府推



官既罷又辟司錄河南人多賴之而守尹屢薦其材君亦工書喜為詩間則從余遊其語言簡而有意飲酒終日不亂雖醉未嘗顛墮與之居者莫不服其德故師魯誌之曰飭身臨事余嘗愧堯夫堯夫不余愧也始君之葬皆以其地不善又葬速其禮不備君夫人崔氏有賢行能教其子而二子孝謹克自樹立卒能改葬君如吉卜君其可謂有後矣自君卒後文僖公得罪貶死漢東吏屬亦各引去今師魯死且十餘年王顧者死亦六七

年矣其送君而臨穴者及與君同府而遊者十益八九死矣其幸而在者不老則病且哀如余是也嗚呼盛衰生死之際未始不如是是豈足道哉惟為善者能有後而記於文字者可以無窮故于其改葬也書以遺其子俾碣于墓且以寫余之思焉吉甫今為大理寺丞知緱氏縣山甫始以進士賜出身云

胡先生墓表

歐陽脩

先生諱瑗字翼之姓胡氏其上世為陵州人後為泰州

如臯人先生為人師言行而身化之使誠明者達昏愚者勵而頑傲者革故其為法嚴而信為道久而尊師道廢久矣自景祐明道以來學者有師惟先生暨泰山孫明復石守道三人而先生之徒最盛其在湖州之學弟子去來嘗數百人各以其經轉相傳授其教學之法最備行之數年東南之士莫不以仁義禮樂為學慶厯四年天子開天章閣與大臣講天下事始慨然詔州縣皆立學于是建太學于京師而有司請下湖州取先生之

法以為太學法至今著為令後十餘年先生始來居太學學者自遠而至太學不能容取旁官署以為學舍禮部貢舉歲所得士先生弟子十嘗居四五其高第者知名當時或取甲科居顯仕其餘散在四方隨其人賢愚皆循循雅飭其言談舉止遇之不問可知為先生弟子其學者相語稱先生不問可知為胡公也先生初以白衣見天子論樂拜秘書省校書郎辟丹州軍事推官改密州觀察推官丁父憂去職服除為保寧軍節度推官

遂居湖學召為諸王宮教授以疾免已而以太子中舍致仕遷殿中丞於家皇祐中驛召至京師議樂復以為大理評事兼太常寺主簿又以疾辭歲餘為光祿寺丞國子監直講乃居太學遷大理寺丞賜緋衣銀魚嘉祐元年遷太子中允充天章閣侍講仍居太學已而病不能朝天子數遣使者存問又以太常博士致仕東歸之日太學之諸生與朝廷賢士大夫送之東門執弟子禮路人嗟嘆以為榮以四年六月六日卒于杭州享年六

十有七以明年十月五日葬于烏程何山之原其世次官  
邑與其行事莆陽蔡君謨具誌于幽堂嗚呼先生之德  
在乎人不待表而見於後世然非此無以慰學者之思  
乃揭于其墓之原六年八月三日廬陵歐陽脩述

文章辨體彙選卷六百八十六